

L4

VITA
S. CAROLI
COMITIS
FLANDRIÆ,
MARTYRIS.

*Ab Auctore coætaneo Fr. Gualtero Tar-
nanensis Ecclesiæ Canonico ante annos
prope quingentos scripta.*

Ex Bibliotheca Sanctæ Mariæ
Igniacensis.



LVTETIÆ PARISIORVM,
EX OFFICINA NIVELLIANA.
Sumptibus SEBASTIANI CRAMOISY,
via Iacobæa, sub Ciconiis.

M. DC. XV.
CVM PRIVILEGIO REGIS.





Nobilissimo ac R^{mo} Domino,

D. LEONORO

D'ESTAMPES DE VAL-

LANÇAY, REGIS CONSILIA-

rio & Elcemofynario, Abbati

Burgoliensi.



*Q*UOD iam pridem optaram,
Praesul amplissime, vt publicè
aliquid extaret, quod meam
erga te observantiam testare-
tur; maluissem equidem iusti potius Volumi-
nis, quàm Libelli huius dedicatione prestari.
Sed fecit impatientia desiderij mei, vt cum
ferre longiores moras non possem, oblatam
occasionem arriperem, satiusque arbitrarer
hoc quaecumq; animi mei testimoniũ dare,
quàm nullum. Et quanquam eiusmodi est
hic Libellus, ni fallor, vt si non mole sua, sed
merito aestimetur, historiae studiosis omnibus
probari ac placere queat: pretium tamen illi

atque gratiam in primis addet clarissimi nominis tui commendatio. Quis enim non libentissimè legat, quem suffragium ab eo meruisse cognorit, qui cum ad eximiam generis nobilitatem, singularem divina humanaque doctrina laudem adiunxerit, tum ingenij, præterea sui, doctrinaque, quod in ista ætate ac familia splendore rarum est, tam illustrium in publicis scholarum exhedris, tum in sacris concionum pulpitis cathedrisque documenta præbuerit? aut quis auctorem eum non ultro recipiat, cui tu non modò locum in tua, quam instructissimam & copiosissimam habes, bibliotheca dederis, sed tutela, etiam tua patrociniū cōcesseris? Quare tum erit, humanissime Præsul, hunc declarandi erga te obsequij mei conatū benignè interpretari. Nam apud alios non verebor ne inconsulto videar fecisse, qui prodeuntis in lucem opusculi tenuitatem lectissimi patroni dignitate subleuandam putarim.

Tuæ Reuerentiæ obseruantissimus

SEBASTIANVS CRAMOISY.



G V A L T E R I
TARVANENSIS CA-
NONICI LIBELLVS.

De genere & vita , morte & vindicta
Caroli Comitis Flandriae.

PROLOGVS.

DOMINO SVO ET PATRI
merito sanctitatis totius reuerentia deuotionis
excolendo , IOANNI sanctæ Taruanensis
Ecclesiæ Episcopo , frater GVALTERVS
dignationis eius inutilis seruus debitum omni-
modæ subiectionis obsequium.

RÆC E P I T humilitati
meæ auctoritas reueren-
da paternitatis vestræ, vt
quia his nostris tempori-
bus horrenda nimis à nefandis ho-

A

minibus in partibus istis perpetrata sunt crimina, vniuerso mundo execrabilia, & in ultionem eorumdem formidanda multum diuinæ iustitiæ eminuerunt iudicia, pro eorum immanitate æquissima retributionis læce ponderata: & hæc omnia quantum præteritis generationibus inaudita, tam præsentibus mirabiliora, sicut gesta sunt cuncta stylo percurram, & ad notitiam posterorum scribendo transmittam. Quæ omnia ideò scribi, & scripto futuris temporibus manifestanda seruari decreuit prouidentia vestra, vt eis lectis vel auditis, & boni tanta superni iudicis æquitate considerata, in amorem ipsius ardentius excrescant, & mali tam terribili diuinæ ultionis iudicio cognito, per timorē ipsius à sua se prauitate compescant. Accessit etiam vestræ iussioni domni G O S C E L I N I Decani, & fratrum nostrorum

amica mihi & omni cum honore
semper suscipienda petitio, cui in
cunctis Deo placitis obtemperare
feruente opto desiderio. Vestræ igitur
sanctitatis auctoritate, & fraterna
cogente caritate, aggrediar, ipso, qui
linguas infantium facit disertas, ad-
iuuante, ac meæ ariditatem linguæ
suæ rore gratiæ irrigante, & irrigan-
do fecundante, quod iniungitis age-
re; virtute magis fretus obedientiæ,
quàm eius, quam nondum adeo, ut
id audere debeam, assequutus sum,
literalis scientiæ. Conabor autem,
quia etiam sic, si placet vobis, omni
næuo falsitatis, & vulgaris incerto
opinionis euitato; simplici tamen ut
potero, quæ acta sunt narratione re-
ferre: quatinus & superfluis verborum
phaleris, & rhetoricorum ornamen-
tis colorum exquirendis minus in-
tentus, fastidiosam sic caueam proli-
xitatem, & nec nimiam breuitati stu-

dens, earum quas vel ipse vidi, vel virorum veracium testimonio indubitanter cognoui, rerum lectoris cognitioni duntaxat necessariam occultare inueniar veritatem. Et ut facilius elucescat omne quod dicitur, totam sequentis seriem Opusculi, compendiosis comprehensam titulis, numeris singulorum paginae praefixis, disposui designare: quo videlicet lectori caeca quodammodo pagina tædiū nequaquam pariat, & ad inueniendū quod quæritur expeditior aditus pateat. Quòd si singula naturali non perstrinxero ordine, Lectoré precor nequaquam id moueat: sed & posteriora cum se intulerint, opportunè aliquando anticipando præmittere, & priora liceat ordine artificiali quâdòque recapitulando subiungere; dum tamen, vbi exegerit ratio, satis appareat quid quo gestum sit tempore.



INDEX CAPITVM.

<i>De tempore & loco mortis Caroli. Cap. i.</i>	
<i>De martyrio patris eius, & morte fratris eius, & primordiis virtutū Caroli. ii.</i>	
<i>Memoria probitatis Roberti iunioris. iii.</i>	
<i>De reuerfione eius ab Hierufalem & morte.</i>	iv.
<i>De prouectu filij eius Balduini.</i>	v.
<i>De defectu eiusdem & fepultura.</i>	vi.
<i>De fubftitutione Caroli.</i>	vii.
<i>De tempeftate guerrarum oborta.</i>	viii.
<i>De eadem auxilio Dei fedata.</i>	ix.
<i>De manfuetudine eius, & aliorum elatione.</i>	x.
<i>Qualem fe correptoribus & fubditis exhibuit, & pauperibus.</i>	xi.
<i>De feueritate eius erga superbos ac barbaros, & fagacitate in caufis.</i>	xii.
<i>De peruerforum malitia aduerfus eum excitata.</i>	xiii.

De Praposito Brugensi, & domesticis eius.

XIV.

De calumnia seruitutis. XV.

De inimiciis Burchardi & Tangmari.

XVI.

De conditione treugarum & infractiōe earum. XVII.

De querela Tangmari & cōtumelia Prapositionum. XVIII.

De rapina Prapositionum absente Comite.

XIX.

De reuersione Comitis & vindicta deliberatione. XX.

De destructione munitiois Burchardi. XXI.

De legatis à Praposito ad Comitem missis pro Burchardo. XXII.

De furore Prapositi, & suorum, & nequitia legatorum. XXIII.

De coniuratione eorum, & quod Comiti non potuit persuaderi. XXIV.

De elemosyna Comitis, & oratione, ac interfectione. XXV.

Comparatio sceleris perfidorum & sceleris

- Iudeorum.* xxvi.
Commendatio martyrij Comitiss. xxvii.
De morte Castellani & filiorum eius & Gualteri. xxviii.
Præpositales corpus eius alibi decernunt tumulari. xxix.
De contracto sanato. xxx.
De populi veneratione, & Præpositi obduratione. xxxi.
De sepultura corporis eius. xxxii.
De obsidione Brugensium. xxxiii.
De fuga Isaac, & latebra eius. xxxiv.
De vulgatione eius, & monachatu, & captione, & interitu. xxxv.
De obsidione aucta, & munitione irrupta. xxxvi.
De effugio Præpositi, & latibulis ipsius. xxxvii.
De proditiōe eius & morte. xxxviii.
De pugna Guidonis, & amborum irrisione. xxxix.
De fuga Burchardi, & miraculo in nani. xl.

8 INDEX CAPITVM.

- De proditiōe ipsius. XLi.
- De comprehensioe eius, & patibulo, &
morte. XLII.
- De perturbatione post mortem Comit̃s,
& pace. XLIII.
- De aduentu Regis, & ordinatione Comi-
tatus. XLIV.
- De impedimentis regia dispositioni obuian-
tibus, & Comit̃s processibus. XLV.
- Brugensium deditio, & miraculum in ali-
mentis, & Ecclesie purgatio. XLVI.
- De miraculo in corpore Comit̃s ostenso, &
eo tumultato. XLVII.
- De expeditione regali, & traditione Y-
prensi. XLVIII.
- Guillelmus capitur, Ypra incenditur, Flā-
dria subigitur. XLIX.
- De supplicio dedititorum Brugensium. L.
- De improbitate Ingrasni, & fuga. LI.
- De Guillelmo Vironiacensi, & fuga eius.
LII.
- Conclusio libelli. LIII.

CAPVT I.

DE TEMPORE ET
loco mortis Caroli.

ANNO itaque Verbi Incarnati M. C. XXVII. Indictione v. sexto Nonas Martij, terræ nostræ pace sublata, quiete turbata, deleta honestate, extincta omni fere felicitate mortalium, guerrarum, laborū, turpitudinum, & totius infelicitatis detestabile cœpit exordium. Eodem enim ipsius anni die, in vnus vita multorū vitæ periclitatæ; & ex vnus indebita morte multorum iusto Dei iudicio mortes debitæ terribili quadam generatione sunt propagatæ. Tunc namque, secundum Prophetā, in memoria rediit iniquitas patrum nostrorum in conspectu Domini, &

antiqua peccata nostra noua cœperūt
ultione feriri: vt in cuius manu post
Deum hætenus constiterat salus po-
puli, eo de medio sublato manifestè
daretur intelligi, quòd diuini iam in
publicum prodiret censura iudicij,
quæ prius latuerat in occulto præsci-
entiæ Dei. Ipso enim die in plurimorum
perniciem execrabili quorundam sce-
lere interfectus est Brugis in Ecclesia
S. Donatiani Carolus Comes Flan-
driæ, filius Canuti Martyris, Regis
quondam Daciæ, & Adelæ Reginae,
quam postea duxit vxorem Rogerius
Dux Apuliæ. Vt autem interfectionis
eius occasionem, & cælestis vindictæ
animaduersionem in mortis eius au-
ctores terribiliter exertam euidentius
possimus ostendere, narratiunculæ
nostræ exordium paulò superiùs libet
repetere.

CAPVT II.

De Martyrio patris eius, & matre fratris eius, & primordiis virtutum Caroli.

Pater ergo ipsius rex prædictus, postquam suorum perfidiâ in ea, ad quam timore mortis confugerat, occisus est Ecclesia, Domino per eum operante signa & prodigia, inter Martyres computatus apud Dacos, ex tunc & hætenus in magna veneratione est habitus. Regina verò cū hoc filio suo paruulo ad patrē suum Robertum, strenuissimum Marchionem, Roberti quondam Francorum Regis ex filia Adela nepotē, cognomento Frisonem, & matrem nobilissimam Gertrudem clara Saxonum stirpe progenitam, in Flandriam reuerſa, ibique aliquanto tempore morata, memorato Duci Rogero à pa-

rentibus est nuptum data. Cui & filiū nomine VVilhelmum peperit, qui patri defuncto in Ducatum successit, & honorem acceptum morum ingenuitate ac strenuitate multipliciter nobilitauit. Sed audito vnici sui germani exitu, primum quidem inconsolabiliter dolere, deinde etiam ipse cœpit lethaliter languere. Qui vt se periclitari cognouit, Salernitanum Archiepiscopum, & Troianum Episcopum aduocauit, atque quod antea dum incolumis esset fecerat, eorū quoque testimonio desiderans confirmari, quicquid mobilium, vel immobilium in terra possidere videbatur, beato Apostolorum Principi Petro, eiusque Vicario sanctissimo Papæ Honorio, ex cuius ore sacro hoc ipsum frequenter audiui, iure perpetuò possidendum delegauit, ac deinde in confessione Domini ab hac luce migravit. Hic autem noster Ca-

Comitis Flandria, Martyris. 13

rolus annis pueritiæ transactis adultus, postquam militiæ cingulum accepit, Hierusalem sanctam, sepulcrum Dominicum visitaturus, deuotus adiuit, ibique aduersum paganos fidei nostræ inimicos arma ferēs, Christo Domino aliquanto tempore strenuè militauit, & ei, cui præ omnibus seruiendum esse prudenter aduertebat, suorum primitias laborum & actuum dedicauit: mox diuina ordinante dispositione, ad auunculum suum Robertum iuniorem Marchionem, in Flandriam reuertitur, & ab illo eo, quo talem iuuenem decebat, honore suscipitur.

CAPVT III.

Memoria probitatis Roberti iunioris.

CVius gloriosi Principis quia mentionem nunc incidenter fecimus, operæpretium videtur esse,

vt quædam eius virtutum insignia vel breuiter commemoremus. Hic est enim Robertus ille Comes inclytus, superioris Roberti Frisonis filius, qui audito illo sancti & omnium sanctorum memoria recolendi Clarimontensis Concilij decreto; de venerabili scilicet Dominicæ Passionis & Resurrectionis loco à paganorū manibus eruendo, & Christianæ fidei vindicando, continuò vxorem & liberos, postremo cuncta quæ in mūdo possidebat, Christi Domini seruitio postponenda Euangelicè doctus iudicauit, & Crucis eius in humeris baiulando insignia, ac ipsius etiam corporalia qua poterat sequendo vestigia, illud Apostolicæ Sedis mandatum tota fidei adimplere constantia, cum aliis quos inspirauerat gratia, alacriter properauit. In qua expeditione, & vrbium terræ illius, præsertim Antiochiæ & sanctæ Hierusalem expugna-

tione, innumera fortitudinis & probitatis suæ præclara dedit indicia: quorum nonnulla illa, quæ de gestis Francorum Hierusalem pro Christo expugnantium scripta est, comprehendit Historia. Ex qua ad laudem eius hoc solum hîc satis est commemorari, quod ob inuincibilem animi constantiam, ab ipsis quoque Arabibus ac Turcis Georgij filius scribitur appellatus.

CAPVT IV.

*De reuersione eius ab Hierusalem,
& morte.*

Igitur incredulis nationibus manu Domini valida debellatis, & in sancta ciuitate Arnulfo Patriarchatus honore, Godefrido Duce regni diademate sublimatis, Domino prosperante in propria remeauit, & terram suam reliquo vitæ suæ tempore

magna insignis modestia feliciter gubernauit. Post prælibatam autem Caroli nostri susceptionem breui tempore euoluto, in Francia apud urbem Meldorum paucis diebus ægrotans obiit, & in Monasterio beati Vedasti, ciuitate Atrebatû magno cum luctu vniuersorum sepultus filium suum, quẽ ex nobilissima coniuge sua Clementia susceperat, Balduinum adolescentulum hæredem reliquit.

CAP. V.

De prouectu filij eius Balduini.

QVI non multo post à Rege Ludouico muneris militaris, & paternæ hereditatis donum adeptus, domni Caroli præcipuè consiliis vsus, & institutionibus instructus, ad tantam fortitudinis & strenuitatis eminentiam in breui excreuit, vt omnibus probitatem eius attendentibus
appa-

appareret mirabilis, & finitimis quibusque non solum Comitibus ac Ducibus, sed ipsis quoque Regibus omnino fieret formidabilis. Cuius sicut virtus supra modum ætatis eius subitaneis incrementis enituit; sic occulta Dei dispositione cœptis eius obuiante, diu durare non potuit. Eo enim tempore Guillelmum exhæredatum, filium scilicet Roberti Comitis, filij Guillelmi Regis Anglorum cognomento Pileati, quem videlicet Robertum ex Mathilde Regina præfati Roberti Frisonis germana, sicut & fratres eius Guillelmum & Henricum genuerat, quemque idem frater eius Henricus Rex Anglorum captivum tenebat: ipsum, inquam, Guillelmum adolescentem in sui tutelam patrociniij susceperat, & armis eius militariibus instruxerat. Et quia ei hæreditatē suam Normaniā, patruo ipsius, qui eam post patris ipsius captionem ob-

tinuerat, totis renitente viribus restituere proposuerat, grauibus eam & crebris incursionibus infestabat. Cuius iam partem magnam cum oppidis & munitionibus sibi subegerat: reliquam ferè omnem, ipso Rege Hérico nec armorum fortitudine, nec opum amplitudine defendere valente, gladij sui timore mirum in modum contremiscere cogebat. Sed verè, ut ait Propheta, Non est fortitudo, non est consilium contra Deum: verè solus potens est, qui omnium potentiam quando vult, & quomodo vult, ad nihilare potens est.

CAP. VI.

De defectu eiusdem, & sepultura.

CVM enim tanta ageret, & multo maiora disponeret, scuto ipsius, ut aiunt, ictu aduersi cuiusdam militis fronti eius eliso, & ex ipsa illusione

modico in eo, quo salutiferum crucis
signum imprimi consueverat, loco,
tumore oborto, totum illud tantæ
potestatis, quod quasi in montem
magnum tam citò excreuerat, culmé
citiùs detumuit, & sicut fumus ad
modicum parens euanuit. Nam me-
dicorum cura quotidie in peius pro-
ficiente ægrotare cœpit, & tandem
in villa Rosilaria monachatus habi-
tum summa cum deuotione, humili-
que supplicatione adeptus, cum illo
quo circiter decem mensibus fatiga-
tus fuerat languore, anno Domini
M. C. XIX. xv. Kal. Iulij vita defe-
cit, & ad Monasterium S. Bertini de-
latus, cum immenso omnium Pro-
cerum terræ fletu, & miserabili plan-
ctu, ante altare sanctæ Crucis tertio-
decimo Kal. eiusdem mensis sepultu-
ram accepit.

CAP. VII.

De substitutione Caroli.

VEruntamen, quamvis matre sua cum quibusdam aliis assentientibus ob amorem Guillelmi filij Comitis Philippi, filij prælibati Roberti Frisonis, qui neptem ipsius Comitissæ vxorem duxerat, quemque ipsa filio succedere maximè optabat, plurimum renitente, antequam ab hac luce migraret, hunc virum gloriosum, de quo agere proposueramus, Carolum, cuius probitatē prius & industriam in multis sæpe probauerat, sibi ipse instituerat, eique rerū omnium summam regendam ac disponendam tradiderat: cui etiā prius nobilem puellam Margaretam, Rainaldi Comitæ Clarimontensis filiam matrimonio copulauerat, & Comitatum Ambianensem cum Castello

Incensi donauerat. Quæ omnia non tam illius iuuenis, quàm superni iudicis æstimauerim gesta ordinatione, qui iuuenilis animi, & maturis consiliis minus idonei, voluntatem quò voluit occulta sua inclinauit inspiratione. Scriptum quippe est, *Cor Regis in manu Domini, & quò voluerit inclinat illud.* Nisi enim hæc ita fieri diuini decretum arbitrij ordinasset, nequaquã apud illum talem animum vnus dilectio trium, & hoc matris, & consobrini, ac consobrinæ amor præponderasset. Quod etiam consequentiũ signis euentuum euidentissimè declaratum est. Nam quis, rogo, tãtos bellicarum fluctus procellarum, contra cum enormiter exaltatos tantã velocitate deiecit, nisi qui huius hominis ministerio ad tempus tranquillitatis prouidere voluit eorum quos fecit? Vnde Psalmista, *Statuit procellam eius* *Psalm. 106.*
in ore, &c. 29.

CAPVT VIII.

De tempestate guerrarum oborta.

ET enim postquam eo quo præmissum est ordine istius gubernacula terræ regenda suscepit, continuo Clementia Comitissa prætaxatâ ob causam cæca stimulata inuidia, Louaniensi Duci, quorundam etiam Procerum terræ sibi suffragante perfidia, matrimonij fœdere se sociauit, & pactum concordiæ, quod inter Carolum & eam filius eius Marchio Balduinus in vltimis agens composuerat, dissipauit, ac marito sibi cum Comite Montense annuente, & Rege Franciæ Ludouico, occultè tamen ut à multis putatum est, cœptis eius fauente, de finibus Flandriæ, cuius circiter duodecim oppida tunc ipsa tenebat, cum expellere parauit. Hugo quoque Comes Sancti Pauli, co-

gnomento Campus-auenæ, hac suæ malitiæ exercēdæ opportunitate perspecta, antiqua & inueterata prius contra eum odia renouare, & partes sibi terræ contiguas incurfare, & tam incendiis quàm rapinis vehementius solito cœpit more suo omnia deuastare.

CAPVT IX.

De eadem auxilio Dei sedata.

His ergo omnibus in exterminium eius vnanimiter conspirantibus, & sæuos guerrarum tumultus circumquaque in perniciem nostræ gentis excitantibus; ipse, qui occulto suæ virtutis iudicio dissipat cōsilia gentium, reprobatur autem cogitationes potentum, & reprobatur cōsilia Principū, *Prospexit de excelsō sancto* *psal. 72.*
suo: Dominus de cælo in terram aspexit, vt ^{10.}
audiret gemitus compeditorum, & solue-

ret filios interemptorum. Fideli namque suo Carolo, & contra eos bellandi imperterritam confidentiam, & vniuersos debellâdi insuperabilem propitius concessit potentiam. Omnis enim ille bellorum circumfrementiũ strepitus, quanta suscitatus fuerat superbiæ feritate, tanta in breui repressus est victoriæ celeritate. *Mirabiles* siquidem *elationes maris*, *mirabilis in altis Dominus*. Neque enim tam mirandum arbitror, quod tantorum motus Principum, & eos pertinacissimè insurgentes in breui represserit, quàm quod vniuersis illis, absque omni ferre sanguinis effusione, summum sui terrorem incusserit: intantum vt post qualescumque pacis conditiones ab eo impetratas, nullus eorum rebellionem vel semel reparare, aut id de se suspicandi tenuissimam dare occasione ausus fuerit. Comitissa itaque, & infelicius iam Ducissa, inopinatis

viri successibus pressa, pacem ab illo petere, & quatuor oppidorum suorū, scilicet Dichemnam, & Bragium, Ariam, & S. Venantium ei guerpire coacta est. Et quæ prius per guerram disposuerat aliena iniuste obtinere, suis magna ex parte amissis, reliquo contenta didicit pace gaudere. Ipse tamen ei, sicut omnibus fidem integram conseruauit, & cum omni honore eam deinceps & humanitate tractauit. Hugone verò in sua proteruia perseuerante, S. Pauli castrum postmodum sibi traditum destruxit, & munitiones omnes in planitiem redegit, & ipsum in posterum quietius degere, & agriculturæ, quā prius circumquaque debacchando inhibuerat, operam dare inuitum coegit. Sed postea, vt dicunt, necessitate in voluntatem commutata, hic ipsum visus est libenter amplecti, & quandiu idem Princeps aduixit, commo-

dius arbitratus est pacis securitate gratulari, quam rapinarum & incendiorum iacturis turbare & turbari. Gualterum quoque Hisdinij Comitem, consueta fatuitate & vecordia, etiam ipsum rebellionem parare, & cum Hugone conspirare deprehensum, non solum castro, sed & patria expulit, & alium ei successorem statuit. Verum, ultimo vitæ suæ anno eius misertus, redditus aliquos competentes ei concessit, ad sustentationem necessariam victus. Comitem quoque Montensem, & Thomam Comitem Codiacensem, partes nostras pro viribus inquietare consuetos tanta strenuitate perdomuit, ut non tantum ab iniuriis aliis inferendis temperarent, sed & sibi fortuito illatas, vellent nollent, quieti tolerarent. Sic ergo vniuersa perturbatione guerrarum auxilio Dei sedata, in conspectu eius siluit terra.

CAPVT X.

*De mansuetudine eius, & aliorum
elatione.*

QUA pacis tranquillitate potius, qualem se quantumque exhibuerit, verbis explicare nequam sufficio. Deo namq; deuotus, cunctis seruis eius, Ecclesiarum videlicet Prælati, & quibuslibet Religiosis omni se humilitate substernebat, & eorum mandatis reuerenter obediens, correptiones, quibus eum pro loco & tempore redarguendum arbitrabantur, patienter & humiliter sustinebat, & emendationem in posterum & cautelam tota cum mansuetudine promittebat. Quod idcirco in eius moribus magis nobis laudabile videtur, quia hoc in aliis non solum huius mundi, verumetiam Ecclesiasticæ dignitatis primoribus,

rarò & difficile inuenitur. Quorum plerique postquam alicuius vel modicæ fuerint potestatis culmé adepti, & à subiectis quibuscumque incœperint honorari, naturalis mox conditionis & propriæ fragilitatis obliti, & quasi quodam fastigio vanitatis elati cæteros despiciunt, quos naturæ sibi ordine æquales minimè recognoscunt. Sapiētiores se & probiores omnibus credunt, quos dignitatis sorte præcedunt. Qui dum mundi voluptatibus dediti vitiorum sordibus inquinantur, & superbiæ tumoribus inflati inaniter eleuantur, reprehensionibus quorumlibet corrigi omnino dedignantur, quibus etiam frequenter asperantur magis quàm emendantur. Sicque dum nec Deum, nec homines metuunt, velut equi effrenes in vitia per præceps ruunt. Et vt qui in sordibus sunt, secundum Scripturam, ampliùs sordescant, tremendo

omnipotentis agitur iudicio, ut non solum eis quæ reprimat desit correctio, sed & plerumque quæ vitia nutriat adsit adulatio: dum videlicet subditi quæ ab ipsis perperam aguntur, non solum non reprehendunt, verumetiam ut laudetur peccator in desideriis animæ suæ, laudant sæpe placendi studio, quæ rectitudinis zelo vituperare debuerunt. Vnde & Ezechiel dictum est, *Linguam tuam adhærescere faciam palato tuo, & eris mutus, nec quasi vir obiurgans, quia domus exasperans es.* Et per Prophetam, *Popule meus, qui beatum, &c.* Ezech. 3. 26. Esai. 3. 11.

CAPVT XI.

Qualem se correctoribus & subditis exhibuit & pauperibus.

VErum hic noster Marchio venerabilis Carolus suis correctoribus mansuetum se & humilem

exhibebat, & frequenter etiam gratias agebat, vt auxilium ei diuinum, quomodo id quod dicebant operaretur, suis precibus impetrarent, deuota supplicatione petebat. In quo nimirum non tam hominibus quam Deo, cuius ipsi legatione funguntur, se obtemperare ac deferre arbitrabatur: sciens, & prudenter aduertens, quod ipsius ore Veritatis in Euāgelio dictum est, *Qui vos audit me audit; & qui vos recipit me recipit.* Ecclesias etiam & suæ potestatis homines, secundum prauam aliorum Principum consuetudinem, exactionibus quibuscumque non solum non grauabat, sed publicis omnium vtilitatibus intentè prouidendo, multipliciter releuabat, omnibusque in commune pij more patris sollicitè prouidebat. Quod sane vel per hoc probari potest, quia cum illis, duobus annis ante mortē ipsius præteritis, terræ sterilitas, &

messium raritas magnam alimentorum penuriam induxisset, ipse agricolis suorum reddituum, vnde ipse viuere, & familiam suam alere debebat, magna parte misericorditer condonauit, & non tantum superfluas, sed & plerumque necessarias ceruissiarum confectioes & potationes prorsus ad tempus interdicens, & parcitatis modum immoderatis imponendo, necessariam vniuersis vitæ sustentationem paterna sollicitudine prudenter procreauit. Decreuit etiã, vt quicumque venalem faceret panem, non vnum, vt fieri solebat, sed duos quamlibet paruos, singulis nummis distraheret, vt pauperi cuius nummum fortem non habenti, vel obolo emendi facultas suppeteret. Quid, oro, faceret de maximis, qui tantopere prouidebat de minimis? Tempore quo, quia multos esse videbat egenos, per singulas curtes suas, quas

multas habebat, eos deputavit centenos, & de suo quotidianam eis stipem administrari imperavit. Præterea in quacumque vrbe, oppido, vel villa esset, innumeri quotidie ad eum confluebant. Quibus ille alimenta, nummos, & vestimenta propriis præcipuè manibus distribuebat: adeo ut apud Ypram vno die septem milia octingentos panes eū erogasse, ipsorum qui affuerunt memoria proderit. Neminem enim frustratum à se recedere patiebatur, vestesque etiā, quibus preciosis admodum utebatur, sibi detractas eis frequenter largiebatur. Audierat enim Euangelicū

Math. 5. illud, Beati misericordes quoniam ipsi mi-
7. & 25. sericordiam consequentur. Et illud: Quod
40. vni ex minimis meis fecistis mihi fecistis.

Quorum miseriis ita afficiebatur, ut cum eos in aliquo vexari vel affligi videret, ex totis eis visceribus condoleret, implens & ipse pro modo suo

suo

fuo quod Apostolus ait de seipso:
Quis infirmatur, & ego non infirmor? 2. Cor. 11.
quis scandalizatur, & ego non vror? Ne 29.
 autem in his omnibus quasi de tanta
 liberalitatis excellentia pro singula-
 ritate notabilis censeretur, alios quo-
 que ad ipsum pietatis opus non solû
 exemplo, sed etiam exhortationis
 verbo crebrò inuitabat. Aiebat enim
 tantam regni Dei comparâdi oppor-
 tunitatem piis fideiû mentibus pror-
 sus nequaquam esse negligendam:
 sed idcò ad præsens in benedictione
 seminandum, vt de benedictione in
 futuro metant vitam æternam.

CAP. XII.

*De seueritate eius erga superbos ac bar-
 baros, & sagacitate in causis.*

VErum, vt secundum eundem
 Apostolum omnibus omnia
 fieret, sicut humilibus mansuetus, sic

superbis apparebat seuerus, illos videlicet agnina lenitate demulcens, istos leonina seueritate deterrens. Quorū etiam illas, quibus pauperes opprimere consueuerant calumnias iniustas, tanta rigoris districtione coercēbat, vt & secundum Prophetam egenos de manu peccatorum liberaret, & prauorum malitiam, ne supra modum sēuīret, refrēnaret: vt quam non temperabat amor iustitiæ, saltē reprimeret timor vindiētæ. Barbarorum autem maritimas Flandriarum partes inhabitantium indomitā ante id temporis feritatem, humanum, posthabito Dei timore, assuetā crudeliter fundere sanguinem, mira seueritate coercuit. Signa quoque, quibus in sublime leuatis ad pugnas in id confæderatos accersirent, quæq; ob insaniam nimirum bellandi furentium Bacchas lingua illa vocare solebant, prorsus erigi vetuit. Ab vni-

uersis autem catenus aut amabatur
aut timebatur, vt in tanta effera mul-
titudine gentis vix aliquis inuenire-
tur, qui statutis eius publicam ob-
vtilitatem promulgatis vel in mini-
mo contraire tutum arbitraretur. Ve-
ritatis autem & iustitiæ quæus æmu-
lator fuerit, hinc colligi potest, quod
in promissis implendis efficacem, &
in causarum meritis indagandis om-
nino se studebat exhibere sagacem.
Nec ei in hoc deerat gratia Dei, qua
instruente quæcumq; tractanda essent
negotia, mirabili subtilitatis acumi-
ne examinabat; & iniquitatem de-
prehendens & reprehendens, æqui-
tatem verò exaltans & defendens,
iustitiam in cunctis pro viribus exal-
tabat. In quibus omnibus hunc or-
dinem sæpius obseruabat, vt si quan-
do Clerici vel Monachi religiosi ne-
cessitate aliqua cogente, in Curia e-
ius causas agere haberent, eorum an-

te alia & querelas audiret, & causas terminaret, & sic demum ad alia se tractanda conuerteret. Indignum namque prorsus & incongruum iudicabat, vt qui lectioni vacare debet vel orationi, Curia vel huiusmodi negotiorum immoretur actioni, iuxta quod Apostolus ait: *Nemo militans Deo implicat se secularibus negotiis.*

2. Tim. 2.

4.

CAPVT XIII.

De peruersorum malitia aduersus eum excitata.

CUM ergo his & aliis multis vir inclytus polleret virtutibus, quibus enumerandis vel explicandis non sufficit omne quod dicimus, bonis eius studiis quanto amplius boni delectabantur, tanto magis mali torquebantur: quippe cum eius probitate eorum, quibus inuidebant, vitam muniri; & suos viderent & dolerent

conatus impediri. Et quia in aliorum
 perniciem nequitia eorum, timoris
 ipsius catenis impedita, non permit-
 tebatur pro voluntate grassari, eius
 sibi videbantur salute periclitari, &
 quidquid alienis videbāt accrescere,
 suis commodis arbitrabantur depe-
 rire. Quibus nimirum cupiditatis in-
 centiuus, & rapacitatis aculeis incita-
 ti, prius quidem inuidere, deinde oc-
 culta aduersus eum odia exercere, &
 sic demum detractionibus linguas
 laxantes, iusti vitam caninis dentibus
 lacerare cœpere. In quo nimirum pa-
 trum suorum Iudæorum ritè seque-
 bantur vestigia, qui Dominum Sal-
 uatorem eadem persequi probantur
 malitiâ, quam tanto ante comme-
 morauit Propheta, dicens in eorum
 persona: *Circumueniamus instump, quo-* Sap. 2. 12.
niam inutilis est nobis, & contrarius ope-
ribus nostris.

CAP. XIV.

De Præposito Brugensi, & domesticis eius.

ERAT illis temporibus Præpositus quidam Brugensis, Bertulfus nomine, Archicapellanus, & Cancellarius totius Flandrensis Curiae. Qui cum immensas, arridente sibi seculo, congregasset diuitias, quippe qui & ex paterna hereditate, & Principum, Caroli scilicet, & antecessorū eius, liberalitate possessiones haberet amplissimas, ne quid temporalis ei deesse videretur prosperitatis, propinquorum, amicorum, & hominū suorum, quos innumerabiles habebat, turba magnā sibi obediente, culmen adeptus est maximæ potestatis. Quibus omnibus nimium exfaturatus, in superbiam miser est eleuatus. Quod profecto, vt fidenter arbitror,

gratia Dei protegente ei nequaquā contigisset, si bona Dei creatura ad viaticum hac in valle lacrymarū nobis concessa humiliter vti, non autē ordine peruerso, frui ac delectari voluisset. Extirpa bone agricola, spinas de terra cordis mei, vt in eo si non cētenum vel sexagesimū, aut vt minus tricenum afferat fructum, semen verbi tui. Exaudi me cum illo sapiente tuo deprecante te: *Tantum victui meo tribue necessaria.* Et sicut optat Patriarcha Iacob, panem ad edendum, & vestimentum quo operiar. Cū autem, vt ad propositum redeam, omnibus istius mundi bonis floreret lucis huius filius, diuitiarum affluentia potentiā, potentia verò parturiuit ei & peperit superbiam. Qua elatus cæteros despiciebat, & tumore nimio inflatus iam sese nō capiebat. Et quia qualis paterfamilias, tales sunt & domestici eius, nepotes & domestici

Prou. 30. 8

Genes. 28.

20.

eius, quos nimis carnaliter contra suam salutem infelix nutriebat & diligebat, dum prodiret quasi ex adipē iniquitas eorum, eadem qua ipse peste laborare cœperunt.

CAPVT XV.

De calumnia seruitutis.

Accidit autem vt quidam miles nobilis aduersus alium nobilē in Curia Comitis de treugarum infractione placitaret, & ille nota ei seruilis conditionis obiecta, eo quod consanguineam illius Præpositi, quæ ancilla Comitis esse diceretur, vxorē duxisset, respondere vt libero refutaret. Quamobrem omnis illa Præpositi cognatio etiam intolerabili aduersus Comitem Carolum & militē illum exarsit ira. In omnes enim hæc redundare videbatur calumnia. Causa ergo hæc diu quidem ventilata, sed

tandem tali est ratione terminata, ut illa quæ notata fuerat matrona duodecima nobilium manu libertatem suam personaliter assensu Comitis euendicaret, & querela Comitis in reliquam illam parentelam salua maneret. Huius ergo calumniæ talis suspensio domino Carolo prima visa est fuisse interfectionis occasio. Hinc namque grauissima contra eum coeperunt exercere odia.

CAPVT XVI.

De inimicitiiis Burchardi & Tangmari.

SErpens itaque ille antiquus, & humani generis inimicus, hanc suæ malitiæ exercendæ opportunitatem speculatus, medium se malignantibus & superbientibus statim ingessit; & quia in ipsorum mentibus, qui se Regem gloriatur super vniuersos filios superbiæ, sui

thronum regni collocavit, alium
eis, quo sæpius irretirentur & dei-
cerentur, laqueū callidus præpara-
uit. Quidam enim Burchardus ne-
pos Præpositi illius, filius videlicet
Lamberti fratris eius, homo nimis
elatus, & in oculis suis magnus, ad-
uersus Tangmarum vicinum suum,
qui in eleemosynis pauperibus, &
præcipuè Monachis, expendendis,
magnum, vt ferebatur, studium ha-
bebat, & nepotem eius Gualterum,
graues licet, minimis ex causis ortas
exercebat inimicitias, & ex vtraque
parte cædes hominum faciebant nō
minimas.

CAP. XVII.

*De conditione treugarum, & in-
fractione earum.*

SED cultor Dei Carolus treuga-
rum conditiones ab eis sæpè pro

potestate sibi à Domino commissâ exigebat, & ad pacem etiam inuitos crebrò compellebat; in eorum studēs numero inueniri, quibus promittitur ipsa Veritate dicēte: *Beati pacifici, quoniam filij Dei vocabuntur.* Verū præpositus & sui, qui sibi validiores & superbiores videbantur, ad tutelam alterius partis eum intendere suspicabantur: & quia malè sibi conscij liuore mentis interiùs torquebantur, quod ad communem vtilitatem facere laborabat, ad suam depressionē fieri querebantur. Itaque inuidia stimulante incitati, ira sæuiente exasperati, & superbia inflante elati, Tangmarum inopinatum, & gratia treugarum nihil aduersi formidantem ex improviso, fœdere pacis destructo, inuadunt, & curte inferiùs irrupta, in superiorem eum munitionem anxie satis confugere compellunt, virgulta succidunt, & cuncta in inferioribus

reperta dissipant, demoliuntur, & pessundant.

CAP. XVII.

*De querela Tangmari, & contumacia
Præpositium.*

QUA iniuria Tangmarus accepta, querelam Comiti non iniustam depromit, damnum sibi non sine contemptu illius illatum, seque grauiter periclitatum exponit. Illi vero à Comite die & loco determinato in causam vocati, contemptum contemptui superaddere, quam vel per responsalem suam absentiam excusare, elegerunt. Quam quidem iniuriâ vir prudens patienter dissimulauit, & eos interim expectare, & ad correctionem tanti excessus leniter adhuc inuitare deliberauit. Qui cum postea Brugis Præpositum super omnibus his familiariter conuenisset, & mo-

destè satis, vt ei moris erat, corripuisset, & ille tam ex sua quàm suorum parte omnem emendationem in crastinum spopondisset, nihilominus neglexit, & nec ipse venit, nec eos ad satisfactionem adduxit. Sed Comes iterum & iterum prouocatus, licet in despectum sui omnia fieri non dubitaret, æquanimiter ferens etiam tunc in contumaces iustā depromere vindictam dissimulauit, & emendationē iterum longanimiter expectauit. Sed hæc frustra. Etenim patientia ipsius abutentes, & eius occasione in reliquum sibi impunitatem promittentes, in deterius superbia impellente prolapsi sunt, & quos oportuerat priores erratus pœnitēdo emendare, & iustam Domini sui iram vel serò satisfaciendo placare, culpas magis culpis accumulare, & excessus excessibus audacter statuunt exaggerare.

CAPVT XIX.

*De rapina Præpositi alium absente
Comite.*

NAM captatâ, cùm in Franciam fortè perrexisset, Comitibus absentia (omnibus enim iniquitatis operariis semper grauis erat, & quasi carcer quidam intolerabilis, eius præsencia) copiosam congregant & validam militum manum, & omnem ferè incurfantes circa regionem, domosque infringentes, & mobilia quæque diripientes, pauperes exspoliant, & quosdam suspendunt, plerosque in ferro trucidant. Quod quia præteritis temporibus fieri nequaquam consueuerat, cunctis intolerabile nimis & crudele apparebat. Ab antiquo enim & Comitibus terræ nostræ statutum, & hætenus quasi pro lege est obseruatum, vt quanta-

cumque inter quoslibet homines guerra emergeret, nemo in Flandria quicquam prædari, vel aliquem capere aut exspoliare præsumeret.

C A P. X X.

*De reuerfione Comitis, & vindictæ
deliberatione.*

Igitur reuerendus tutor patriæ reuerfus, tantorum criminum atrocitate comperta, grauiter indoluit: & quia in sancta pace, videlicet infra Septuagesimam, hæc gesta fuerant, non tam suam quàm Dei iniuriam, vt dignum erat, ultum ire statuit. Verum quia quónam modo id vindicari oporteret gestiebat, Barones suos, vt tertio Kal. Martij Ypram (vbi & ego ex eius mandato, pro alio tamen negotio, præfens fui,) conuenirent, & quid opus esset facto ex sententia definirent, inuitauit, & vniuersa eo quo

facta fuerant ordine in auribus eorū explicauit. Et ne se solus vindicare videretur, eorum de omnibus consiliū flagitauit. Nec defuerunt, qui se à Brugenſibus iniquè ſpoliatos, verberibusque & contumeliis affectos deplorarent, & iuſtitiam ignominia lacrymoſis queſtibus implorarēt. Vbi diuerſis diuerſa dicentibus, tandem in hoc omnium conuenit ſententia, vt Comes ipſe partes illas præſentialiter viſitaret, & quæ geſta fuerant, viſu & auditu certiùs exploraret; & ſic pro modo culpæ modum temperarēt vindictæ. Qui licet malignas eorum aduerſum ſe machinationes nequaquam penitus ignoraret: præſertim cū prædictus Burchardus iam pridem dixiſſe accuſaretur, Si quis Comitem occideret, quis eum vindicaret? ire tamen decreuit, & milites non paucos ſecum ire præcepit.

CAP. XXI.

De destructione munitiois Burchardi.

CVM quibus in crastinum profectus, cum domos euerfas, res omnes direptas & dispersas vidisset, & ne minima quidem vitæ subsidia pauperibus relicta cognosceret, hinc miserorum lacrymis, inde ingenitæ sibi misericordiæ compassione per-motus, altè ingemuit, & ex imis viscerum medullis longa trahens suspiria, lacrymisque suffusus obortis mirabiliter doluit. Et primum quidem munitio-nem ipsius Burchardi, quā iuxta habebat, quasi tanti mali seminariū & radicē incēdit, euertit, & funditus destruxit, ac deinde tam de his quàm de aliis diligentius tractaturus Brugas eadem die, heu! nunquam reuersurus perrexit. Sequenti die, scilicet Kalendas Martij, eo ibidem morante, &

causas singulorum cū æquitate more suo examinante, dies in vesp̄eram declinauit, & Sol tam peruersas prauorū hominum mentes veritatis lumine destitutas ostendens, eas quas suis radiis illustrare consueuerat, mundi partes relinquens, illis spiritualem, his autem corporalem lucem subduxit, & filiis tenebrarum opera tenebrarū faciendi opportunitatem optatā induxit: *Qui enim male agit, odit lucem.*

CAP. XXII.

*De legatis à Præposito ad Comitem missis
pro Burchardo.*

TVNC, vt ferunt, Præpositus Guidonem de Stenfordo, & alios paucos qui familiares Comitis videbantur, sibi asciuit, eisq̄ legationem suam iniungens ad aulā eius quasi veniam pro nepotibus suis petituros misit. Et illi quidem quod iussi

fuerant exequentes, Comitem statim adierunt, & huiusmodi apud eum, sicut aiunt, non tam pacem quàm querelam deposuerunt. Sufficiat, inquiūt, Domine, magnanimitati vestræ, Burchardi pœna & ignominia iram vestram vos hætenus exsaturare, sufficiat vobis receptaculū eius ad ipsius & totius generis sui iniuriam vos incendiisse. Iam vestræ motus iracundiæ aduersus eum frustra excitatos compescite, & iuueni afflicto iam parcen-tes, & nimis contumeliis laceffito nunc saltem serò ignoscite. Iam nunc si placet, apud vos misericordiæ locū inueniat, quem pœna indebitè illata satis superque contristat & cruciat. Sed & circa genus ipsius odij vestri & iræ impetus refrænate, & quos graui-ter offendistis vel nūc sera satisfactio-
ne placate. His responsum perpaucis ita reddidit Heros. Quid est quod me
motibus meis tantopere asseritis in-

causas singulorum cū æquitate more suo examinante, dies in vesperam declinauit, & Sol tam peruersas prauorū hominum mentes veritatis lumine destitutas ostendens, eas quas suis radiis illustrare consueuerat, mundi partes relinquens, illis spiritualement, his autem corporalem lucem subduxit, & filiis tenebrarum opera tenebrarū faciendi opportunitatem optatā induxit: *Qui enim male agit, odit lucem.*

CAP. XXII.

*De legatis à Præposito ad Comitem missis
pro Burchardo.*

TVNC, vt ferunt, Præpositus Guidonem de Stenfordo, & alios paucos qui familiares Comitis videbantur, sibi asciuit, eisque legationem suam iniungens ad aulā eius quasi veniam pro nepotibus suis petituros misit. Et illi quidem quod iussi

Comitis Flandriæ, Martyris. *ſi*

fuerant exequentes, Comitem ſtatim
adierunt, & huiusmodi apud eum, ſi-
cut aiunt, non tam pacem quàm que-
relam depoſuerunt. Sufficiat, inquiūt,
Domine, magnanimitati veſtræ, Bur-
chardi pœna & ignominia iram ve-
ſtram vos hætenus exſaturare, ſuffi-
ciat vobis receptaculū eius ad ipſius
& totius generis ſui iniuriam vos in-
cendiſſe. Iam veſtræ motus iracundiæ
aduerſus eum fruſtra excitatos com-
peſcite, & iuueni afflicto iam parcen-
tes, & nimiis contumeliis laceſſito
nunc ſaltem ſerò ignoſcite. Iam nunc
ſi placet, apud vos miſericordiæ locū
inueniat, quem pœna indebitè illata
ſatis ſupérque contriſtat & cruciat.
Sed & circa genus ipſius odij veſtri &
iræ impetus refrænate, & quos graui-
ter offenditiſtis vel nūc ſera ſatisfactio-
ne placate. His reſponſum perpaucis
ita reddidit Heros. Quid eſt quod me
motibus meis tantopere aſſeritiſ in-

dulſiſſe, & Burchardo veſtro immeri-
 tò iniurias contumelioſas intuliſſe?
 Quid enim dignum tantis Burchardi
 exceſſibus rependi, ſi vnam domun-
 culam eius ipſo nondum punito in-
 cendi? Nónne multò magis iuſtitia
 exigebat, cum quæ abſtulit pauperi-
 bus ex integro reſtituere, & tantorum
 crimina in carne propria pœna luere?
 Quæ ergo iniuſtè rapuit iuſtè reſti-
 tuat, & conditioné ſui generis agno-
 ſcat, & ſic miſericordiam quam quæ-
 rit inueniat. Nam qua ratione poterit
 indulgentiam obtinere, & rapinam
 pauperum retinere?

CAP. XXIII.

*De furore Præpoſiti, & ſuorum, & ne-
 quitia legatorum.*

HIS Præpoſito perlatis, quamvis
 hac Comitſ allegatione nihil
 iuſtius dici valeret, vtpote quæ & Le-

gis & Euangelij mandatis cōgrueret, ille tamen cum veritati debuisset ac rationi acquiescere, cæcata mente magis cœpit insanire, & suis motibus nimium exasperatus, & diabolico spiritu inflammatus, dira immurmurās, & graues minas spirās, stimulos suis currentibus, & arma sæuientibus ministravit, & quos refrænare debuerat, suæ aculeis iracundiæ amplius incitauit. Auxit quoque furorem dementium, & dementiam furentium, quod præfati Legati non sinceriter egerūt, sed verba Comitis deprauantes, & superbos iuuenum animos deterius exacerbantes, dixerunt, quòd numquam misericordiam à Comite consequeretur, nisi seruos eius se esse omnes profiteretur. Illi ergo ex stultis iam insani, Præposito cum Legatis illis, vt qui totū faciebat ac si nihil facere videretur, corporaliter amoto, pestiferum consilium mox inierunt, & de morte

Domini sui detestabili scelere tractare cœperunt.

CAP. XXIV.

De coniuratione eorum, & quòd Comiti non potuit persuaderi.

Dlabolo autem consilia eorum aspirando præueniente, & cooperando prosequente, ac instigando prouehente, in hanc tandem iniquitatis sententiam sex Principes factionis eorum, videlicet Guelricus frater Præpositi, præfatus Burchardus, & alterius fratris eius Roberti filius Robertus, Guillelmus quoque Viriomensis, & Ingrasnus Hefnensis, & Isaac Præpositi consanguineus conspirant, vt Comitem quàm citiùs potuerint occidant, & id ipsum perficiendum, & donec perficiatur celandum, fidei ne dicam perfidiæ pactione coniurant. Et hæc quidē in nocte sunt gesta, vt puta non lucis, sed te-

nebrarum opera. Quæ omnia licet in occulto factitarentur, latere tamen non potuerunt. Nā rumusculis quorundam delatum, & ipsi quod de periculo eius ageretur est nunciatū. Illi autem ut hæc crederet nequaquā potuit persuaderi. Quippe quem cōscientia sua non solum perperam hac in causa quicquam gessisse non accusabat, verumetiam de rectitudinis opere veraciter iustificabat. Quod nimirum iusto & occulto Dei iudicio actum fuisse facile crediderim, quatinus eius meritis, nostris peccatis, eorum quoque criminibus nefandis exigentibus, illi palma, nobis tristitia, & illis perfidis iusta acceleraretur vindicta. Sic enim, ut credi piè fas est, & illum requie optata donari, & nos quo indigni eramus defensore & protectore orbari, & illos nefarios condigna oportuit pœna multari. O mira in omnibus omnipotentis Dei dispensatio!

CAP. XXV.

*De eleemosyna Comitum, & oratione
ac interfectione.*

NOCTE itaque illa exacta, cum gloriosus Princeps paulò diutius solito in stratu suo gemuisset, surrexit, manus lauit, & sic ad opus misericordiæ more solito deuotus properauit. Sic quippe vitam suam ordinauerat, ut omnibus diebus operum suorum initia Domino dedicaret: ut scilicet antequam ad Ecclesiam procederet, eleemosynam propriis manibus pauperibus dispensaret. Quod etiam ob ingentem in Christum deuotionem nudis consueuerat pedibus celebrare, ita ut neminem in hoc pietatis officio sibi pateretur ministrare: sed singula fercula singulis deferens, singillatim singulorum manus summa osculabatur veneratione. Huic

quoque religiosæ consuetudinis cumulo nuper adiecerat, vt omni die quinque pauperes nouis vestimentis indueret, & calciamentis. Quo elemosynæ sacrificio super sacræ aram fidei humiliter oblato, seipsum mox victimam placationis superimpensurus ad Ecclesiam, nullis comitatus militibus, quippe per hospitia & oratoria vbique dispersis, procedit, & coram altari sanctæ Dei genitricis Mariæ, quod in superiore parte Ecclesiæ S. Donatiani constitutū erat, in orationem se prostrauit. In quo loco cum genua frequenter flectēdo diutius oraret, ac semetipsum attentius Domino commendaret, tandē primum se in pauimento proiecit, & septem pœnitentiales Psalmos pro suorum ablutione peccatorum, libello suo appposito, supplex decantare incœpit. Interim autem Clero, Capellanis eius videlicet, Horas dici Primâ

& Tertiam more Ecclesiastico canēte, cū oratione Dominica iam dicta illi preces Tertiæ, & ille quinquagesimum Psalmum, & ipsum quartum pœnitentialem tribus iam dictis recitaret (nam ita orare consueuerat, vt à circumstantibus audiri valeret) magister fraudis, & ductor sceleris Burchardus, sex sibi spatariis ex clientela Præpositi & sua adiunctis, lateri eius retro improuisus astitit, & nudo cum gladio, vt caput feriendum porrigeret, prius leniter tetigit. Qui cum faciem eleuato capite ad eum conuerteret, frontem illam reuerentissimā superborum deiectricem, humilium erectricem, furibundus valido ictu percussit, & cerebrum eius in pavementum excussit, complicibus quoque eius in hoc ipsum perpetrandum concurrentibus, & cum vnanimiter, nequicquam tamen, cū primus ad mortem eius suffecisset ictus, ferien-

tibus, pluribus caput eius vulneribus conciderunt, & brachium eius dextrum cum manu, qua eadem hora pauperi mulieri eleemosynam petenti nummum, vel potius nummos porrexerat, & alios petentis porrigendos tenebat, ferè amputauerunt.

CAPVT XXVI.

Comparatio sceleris perfidorum, & sceleris Iudaorum.

SED iam liber stylum à narrationis serie parumper declinare, & enormitatem tanti facinoris, ac facinorosorum illorum crudelissimā immanitatem pro modo nostro vel tenuiter considerare. O nefandissime Burcharde, quid fecisti? ô insanissime Bertulfe, quid consensisti? O omnes sceleratissimi huius criminis complices & ministri, quid disposuistis, quid egistis, quid peregistis? Quem, quare,

quando, vbi, & quomodo occidistis? Certè Dominum vestrum, certè pro sua iustitia, certè in Quadragesima, certè in Ecclesia, & hoc certè sine aliqua reuerentia. Comparetur igitur si placet facinus vestrum facinori patrum vestrorum detestabiliū Iudæorum. Illi nempe Dominum suum nō tam manibus quàm lingua extra portam ciuitatis occiderunt; quem tamē Dominum suum esse nequaquam

1. Cor. 2, 8.

cognouerunt. *Si enim*, vt Apostolus ait, *cognouissent, nunquam Deum gloriæ crucifixissent.* Vos autem, quem Dominum vestrum esse sine dubio cognouistis, in loco sancto, in tempore sancto, & lingua & manibus occidere non horruistis. Igitur scelus patrū vestrorum vestro scelere non solūm adæquastis, sed etiam, si dici fas est, superastis. Vnde timendum vobis, & valdè timendum est, ne quos supergressi videmini in culpa, illis quoque

Comitis Flandria, Martyris. 61
gravius cruciemini in pœna. Quorū
etiam exemplo locum & gentem cō-
gruè perdidistis, quæ ne perderetis,
tantum piaculum committere non
timuistis. Et hæc quidem, nisi dignè
pœnitueritis, initia sunt dolorum.

CAP. XXVII.

Commendatio martyrij Comitis.

SED iam ab his tristibus conuer-
tamur, & de Caroli nostri exitu
felici, quæ læta sunt, & omni gaudio
recolenda intueamur. Quem profe-
ctò si diligenti cum discretionē attē-
dimus, cum Martyribus eum nonni-
hil habere commune, vt salua eorum
reuerentia loquamur, non absurde
perpendimus. Nam vt scriptum est,
Martyrem nō tam facit pœna, quàm
causa. Sed huius rogo, vt ita dicam,
martyrij, quæ fuit causa nisi iustitia?
Qui enim ideò occisus est, quia à re-

etudine non declinabat æquitatis,
pro testimonio vtique occisus est ve-
ritatis. Et vt noueris eum hoc mortis
periculum sibi ab illis flagitiosissimis
iam olim intentatum nequaquam
prorsus ignorasse, & tamen iustæ cō-
fidentia causæ non declinasse, in cō-
uentu Procerum Ypræ tertio Kal.
Martij, sicut prædictum est, congre-
gatorum, cū de hoc pessimo Bur-
chardi proposito mētio facta fuisset,
audi quod de bonæ thesauro con-
scientiæ margaritum (iustus quippe
vt leo confidit) protulerit. Ego, in-
quit, ibo, & Deo protectore securus
ibo. Vbi & si me fortè occidi conti-
gerit, pro iustitia certè occumbere
non tam periculosum quàm glorio-
sum erit. De vindicta verò Deus pro-
uidebit. Vt autem coniiicere possis
hoc ipsum eum non transeunter, vel
leuiter, sed prudenter dixisse, accipe
quod ipse ab eo accepi. Cū siquidē

eodem die ad vesperam Præpositus Clericorum regularium in eodem loco commorantium minas quorundam secularium sibi superbia ipsorum impellente intentas mihi exposuisset, meque quid super his facere deberet consulisset, communi consilio ad eum, utpotè defensorem humilium, rem ipsam detulimus, & huiusmodi ab ore, imò ut post patuit, per os de corde eius responsum accepimus. Quascumque, inquit, vobis minas intentent, certus sum quia quandiu vixero, in nullo vos lædere præsument. Quod & si contingeret vos occidi pro veritate, quid hac, quæso, gloriosius morte? Quid enim martyrio excellētius in gloria? Quod proculdubio, quātum ego coniicio, non dixisset, nisi martyrij amore flagraret. Vidisti igitur quæ fuerit causa mortis eius: nunc vide si placet, quod fuerit opus eius. Vtiq; peccata

sua iampridem confessus fuerat, & pro eis tunc pœnitentiam agebat. Orationi eadem hora, vt dictum est, incumbibat, quam etiam eleemofyna acceptabiliorem Domino faciebat. Sed & si de terrenis contagiis aliquæ ei maculæ adhæserunt, sanguinis effusione, & mortis amaritudine credibile est quòd deleri potuerunt. Igitur interfectores eius sibi quidem mortis foueam effoderunt, sed cum per portam mortis ad vitæ ianuam introduxerunt, illum mortalitatis tunica exuerunt, & se confusione sua sicut diploide induerunt.

CAP. XXVIII.

*De morte Castellani, & filiorum eius,
& Gualteri.*

HAC namque cæde peracta, sanguinem adhuc sitientes Tangmarum

gmarum Brugenſem Caſtellanum, qui fortè propè aderat, cæteris diffu-
gentibus inuaſerunt, & multis vul-
neribus confoderunt. Quo factò, cõ-
tinuò quos ſuprà memorauimus cõ-
iurati ſinguli cum ſuis ſatellitibus af-
fuerunt, & vniuerſam villam, quæ in-
ſtar ciuitatis frequens erat & ampla,
nemine reſiſtente perſcrutantes, reli-
quos morti iam pridem ab eis deſti-
natos circumquaque perſequi ſtu-
duerunt. Quorum duos, præfati vi-
delicet Caſtellani filios, Gualterum
adhuc in hoſpitiò remorantem, &
heu! fruſtra fortiter repugnantem, &
Gillebertũ extravillã habitu mutato
cum Caſtellano Curtriacenſi effuge-
re conantem, crudeliter intereme-
runt: & ſic demum ad perquirendũ
Gualterum dapiferum, quẽ elapſum
fugã timebant, redierunt. Sed cùm
Caſtellanum cõfeſſionem Sacerdoti
feciffe, & corporis ac ſanguinis Do-

mini myſteria percepisse, & necdum obisse cognouissent, in Ecclesia ad eum rursus concurrerunt, & per pedes eum arripientes, ac per confragosam graduum inæqualitatem impetuosè trahentes, caput eius singulis illæsum gradibus confregerunt, & sic eum ante ipsius fores Ecclesiæ pertrahentes, palpitantem adhuc in extremis, iteratâ cæde eius spiritum eiecerunt. Gualterum autem cùm diu quæsitum non inuenirent, & de inuentione eius iam desperarent, quidam puer eum dicitur prodidisse, & latibulum quod eum in tâta necessitate opportunè satis occultabat, persecutoribus ostendisse. Qui vt se proditum sensit, veloci cursu protinus fugam iniit, & vsque ad altare S. Donatiani currendo anxius peruenit, & velo, quod altari oppansum erat, se quantum potuit operuit. Quo in loco ministri diaboli persecuti arripuerunt.

Comitis Flandriae, Martyris. 67
runt, & confessionis faciendæ, quam
solam petebat, sibi facultate superbè
negata, de Ecclesia extrahentes occi-
derunt.

CAP. XXIX.

*Præpositales corpus eius alibi decer-
nunt tumulari.*

COrpus itaque domni Caroli,
ministris eius passim latentibus,
ac præ timore mortis nusquam appa-
rere audentibus, cum non esset qui
sepeliret, in eo quo interfectus est lo-
co aliquandiu iacuit, sed tandem Cle-
ricorū inferius est delatus obsequio,
& in chori positus medio tristi mœ-
rentium frequentabatur officio. Ra-
ri tamen erant, qui cum manifestè lu-
gerent, vel qui aliqua super morte
eius tristitiæ signa ostendere, aut do-
loris auderent. Tātus erat metus per-
fidorum, qui etiam decreto decreue-

rant eum ibi nullatenus esse tumulandum, ne eius monumentum ad posteritatis eorum appareret opprobrium. Quo audito, Arnulfus Abbas Monasterij Blandiniensis sequenti die velociter affuit, & eum in Monasterio suo sepeliendum deportare voluit. Quod cum Præpositus cum suis libenter concessisset, & Abba feretrum composuisset, continuo spiritu Dei excitati tam Clerici quam Laici, resistendi audaciam sumpserunt, & vehementer ne fieret, contradicere, & cum armis etiam violenter eis in faciem obsistere & improperare cœperunt. Si nobis, inquiunt, Dominum nostrum neviueret abstulistis, nunquid & mortuum auferre debetis? Qui ergo fecistis ne haberemus viuum, finite habere vel defunctum. Confidimus enim quia quem viuum habuimus patronum & protectorem, interfectum etiam Marty-

rem multo magis habere poterimus fidelem apud Deum intercessorem. Quid plura? Tandem Præpositis & Abbati præualuerunt, & corpus Domini sui in superiora Ecclesiæ tumulandum reportauerunt. Qua hora populi fide feruente, & venerabilis Caroli, ut verè credi decet, merito exigente, quod diuina operata est clementia miraculum non silebo.

CAPVT XXX.

De contracto sanato.

PVER erat à cunabulis nervis claudus contractis, qui non solum non incedere, sed nec etiam vlllo pacto à terra se valebat erigere. Persona quidem modica, sed occasione miseræ suæ plurimis satis nota. Nam & in eleemosyna monachorum S. Andreae Brugensis circiter octo annis

commoratus, & eorum fuerat beneficiis sustentatus. Cui cum Prior loci instrumētum quoddam fecisset, quo adiutus non tam ambulare quàm reptare valeret, qualitercumq; se promouere paulatim cœpit, & Brugas vsque hoc modo perueniens, in domo Reingeri telonearij aliquandiu mansit. Hic ergo cum illa hora iuxta illud venerabile corpus adesset, & sub eius feretro supplex, & opratæ munus sanitatis deuotè mendicans, procubuisset, subito nerui illi diu contracti, virtute prorsus diuina laxari, & membra illa debilia erigi, & in vsum ambulandi firmari ac solidari cœperunt. Sicque gratia Dei, & merito viri sancti, plenæ sanitati ad integrum restitutus est, vt nullæ antiquæ debilitatis reliquiæ in eo residerent. Itaque qui debilis & tristis aduenerat, sanus & gaudens, & Deo gratias agens, recessit. Et quia hoc in fre-

Comitis Flandriae, Martyris. 71
quentia gestum fuit, latere profecto
non potuit.

CAPVT XXXI.

*De populi veneratione, & Præpositi
obduratione.*

Igitur qui præsentēs fuerunt, & tā
euidenti miraculo gloriam Mar-
tyris cognouerunt, tantæ largitori
gratiæ Domino immensas in iubilo
laudes reddiderunt. Videres itaque
continuò innumerabiles promiscui
sexus, diuersæ ætatis viros & mulieres
certatim vndique occurrentes, san-
guinem eius linteis reuerenter exter-
gere, & ferramentis etiam de pau-
mento abradere, pilos capitis eius vel
barbæ gladiis furentium laceratos
cum veneratione colligere, & hæc
omnia ad tutelam sui in posterum
seruanda omni cum diligentia & de-
uotione recondere. Nec frustra. Nam

E iiij

& pileus eius à quodam reseruatus
multa febricitantibus per Dei gratiã
affirmatur sanitatis, fide præueniente,
contulisse beneficia. Ne quis verò in-
credulus calumnietur me hæc omnia
commentari, & loqui ex proprio,
Deum testor quia quæ de morte eius
& miraculis retuli, viri religiosi do-
mni Helix Brugensis Decani, Fru-
moldi Furnensis Præpositi, & aliorum
Clericorum & Laicorum, qui se ea
vidisse affirmabant, cognoui testi-
monio. Verum primo illo patrato
miraculo cum fideles gratulantes ad-
mirarentur, & admirantes gratula-
rentur, & campanæ in laudem Dei
pulsarentur, Bertulfus quidnam sibi
vellet strepitus ille dicitur inquisisse.
Qui, cum res vt contigerat exposita
fuiſſet, non solum credere vel pœni-
tere recusauit, sed ad subfannandum
& deridendum conuersus, etiam ia-
nuas Ecclesiæ, ne populus deuotus

confluere posset, obserari imperauit. Et hæc quidem cum sexto Nonas Martij, quarta feria interfectus fuisset, quinta feria, vt prælibauimus, gesta sunt. Itaque timore Præpositi, Cleri & plebis, repressa est confluentia, & domni Caroli sepultura vsque in sextam feriam protelata.

CAPVT XXXII.

De sepultura corporis eius.

Quo die sane pauci ex hominibus eius & clientibus conuerunt, & in illo quo occisus fuerat loco, sarcophago ex lapidibus & cæmento super pauimentum composito, in eo illum sepelierunt. Porro Sacerdotes & Clerici, quia id in loco homicidiis & humano sanguine polluto fieri ratio & auctoritas non sinebat, in alia Ecclesia cum Missarû & orationum sollempniis Domino

commendauerunt. Præpositus autē & sui, dum quasi aduersario suo de-
iecto exultant, & de regnō sibi com-
parando, ac si non sit qui contradi-
cat, tractant & cogitant, tremendo
diuinæ distictionis iudicio quæ sibi
vindieta præparetur ignorant. Illis
nempe gaudentibus de sanguine, &
thesaurorum eius, quos inuasérant,
direptione, iustus iudex & æquissi-
mus retributor occultè disponit de
ultione. O ineffabilis bonitas & iusti-
tia Dei! Persecutores suos impios Iu-
dæos vsque ad quadragesimum secū-
dum annum post passionem suam,
hoc pœnitentiæ spatio eis misericor-
diter indulto expectauit. Sed quia il-
li, non attendentes quòd patientia
Dei ad pœnitentiam eos inuitaret,
thesaurizantes sibi iram in die iræ
pœnitere neglexerunt, horrēdis sup-
pliciis eodem anno interierunt. His
autem iusti persecutoribus tempus

iustè abbreviauit, & vsque ad octauum diem ultionem vix protelauit. Illi enim quia primitiua in eis nutriebatur, diutius, vt credo, fuerunt misericorditer toleradi. Hi autem, quia prouecta iam Ecclesia in eis, & per eos scandalizabatur, citius extiterunt iustè iudicandi.

C A P. XXXIII.

De obsidione Brugenſium.

NAM ecce octauo die, quasi domino Carolo in sui vindictam quodammodo resurgente, Gervasius vicinus eorum, vit honestus & probus, congregato suorum circiter triginta equitum numero castrum Brugenſe inuaſit, & illis resistere, quippe timore Dei super eos irruente, non audentibus intrauit, & eos in interiorem munitionem refugere coegit. Quod nimirum virtute diuina factum

non dubitauerim : cùm illi & numero, & viribus, & munitione plurimū præstarent. Verùm manus Domini paucorum fidelium confortabat, & multorum infideliū vires & animos effeminabat. Sed & Brugenſium corda municipum ita ſuperna immutauit gratia, vt non ſolum iniuſtæ dominorum ſuorum parti non fauerēt, vel auxilium fauentes præberēt, quin imò eorum conſortium penitus abhorrerent, & eos continuo in munitione qua confugerant, Geruaſio iuncti obſiderent. Duo autem eorū, qui necis domni Caroli cooperatores extiterant, intercepti & comprehenſi, in conſpectu aliorum, in pœnā nimirum & confuſionem eorum, diuerſis ſuppliciis improbroſis, vt dignum erat, tormentati, & ſic tandem ſunt necati, ac partim in cloacas, vbi à Dominis ſuis de muris proſpectantibus videri poſſent, iactati.

CAP. XXXIV.

De fuga Isaac, & latebra eius.

PORRO Isaac vnus de coniuratis, homo potens & diues, cum paulò remotus in loco multum munito habitaret, & illa hora in Ecclesia beatæ Mariæ iniuste & irreuerenter ingressus fuisset, (nam qui Ecclesiam non timuerat superbè violare, Ecclesiæ introitum debuisset humiliter vitare,) ab obsidione hoc euentu fortè interclusus, & nec ad modicum quidem domui suæ disponēs, vitæ quippè suæ consulere cupiens, fuga protinus est elapsus. Cuius domum frater eius Desiderius, qui contra suos se Geruasio in ultionem sanguinis iusti coniunxerat, mox irrupit, & omnem munitionem eius propriis manibus incendio tradidit. Qui ipsum quoq; Isaac si in ea reperisset, haud dubium

quin cum ob vindictam tanti criminis interfecisset. Vide quantum inspiratum eis fuerit odium iniquitatis, quod etiam naturalis vincebat affectum pietatis. In eo enim, qui se complicem fecerat tam nefandæ immanitatis, nec Geruasius propinquitatis, nec Desiderius necessitudinem attēdebat germanitatis. Ille verò diurnis ubi audebat latitans, & nocturnis horis, qua poterat fugitans, ad domū sororis suæ, quam præmemoratus Guido de Stenfordo uxorem habebat, deuenit, & eius conductu vsque ad Monasterium S. Ioannis Teruannensis in monte nostræ ciuitati imminente constructum profugit. Nā quia monachus fieri diuino vel humano coactus timore volebat, monachum quendam Eihaniensem, qui ipsum ei habitum donaret, ibidem operiri proposuerat, sed latere non potuit.

CAP. XXXV.

*De vulgatione eius, & Monachatu, &
captione & interitu.*

FAMA quoque volante delatum,
& per totam urbem confestim
est diuulgatum, quòd in Monasterio
S. Ioannis laterent, qui patrem patriæ
Carolus occidissent. Arnulfus ergo
filius Eustachij aduocati, volens &
ipse sanguinem Comitis vindicare, in
cuius ultionem iam orbem ipsum au-
diebat conspirare, nocte imminente
apparitores suos eo dirigit, qui Abba-
tiam circumquaque tota nocte cu-
stodiant, ne qui latebant in tenebris
vsque effugere valeant. Isaac autem
ubi insidias sibi paratas esse cogno-
uit, ad domnum Abbatem Folquinũ
tremebundus confugit, & vt optatũ
sibi monachi habitum ipse concedere-
ret, humili supplicatione & impor-

tuna fatis tandem obtinuit. Verum-
tamē Arnulfus sequenti die cum suis
Monasterium adiit, & illum eductū,
& ex ipsius confessione deprehen-
sum, cōtinuo veste monachali exspo-
liari, & nudum ac discalciatum reuin-
ctis post tergum manibus ad ciuita-
tem cum tumultu protrahi præcepit.
Vbi dum ne qua Monachatus in eo
vestigia remanerent, capilli capitis
eius omnes penitus abradi fuissent,
ciuibz vtriusque sexus & diuersæ æ-
tatis vndique circumstātibus, & Per-
fidus & traditor statim suspendatur,
vel viuus incendatur, vociferantibus;
sed & ipso Arnulfo hoc idem adim-
plere totis viribus annitente, tandem
pater eius cum matre obstitit, & vt
viuus aliquandiu seruaretur, filio in-
uito extorsit. Quod etiam diuinitus
factum fuisse credibile est: quatinus
præuaricator, & labore pœnæ præ-
sentis, & timore mortis imminētis
diutiùs

diutius torqueretur, & velut impœnitens æternis, vel pœnitens purgatorii tormentis interim cruciaretur. Diebus igitur aliquot euolutis dominus Guillelmus Philippi Comitis filius, cuius superius mentionem fecimus, qui iam post mortem Comitis, magnam terræ huius partem occupauerat, Teruannam venit, & eundem Isaac sibi reddi ab vxore Aduocati, (nam ipse cum filio suo tunc ab erat,) impetrauit. Quem fune collo eius illigato, Ariam secum duci, & in audientia totius populi scelera sua confitentem, seseque omni supplicio dignum adiudicantem, tertio-decimo Kalendas Aprilis suspendi fecit.

CAP. XXXVI.

*De obsidione aucta, & munitione
irrupta.*

Obsidione autem præfata, sicut dictum est, per Geruasium & Desideriū Brugis inchoata, Baldvinus Gandensis, & Daniel Tenremūdenſis ab Oriente, Gualterus Lilariēſis, Riquardus VValnenſis, & Theodoricus Discamudenſis ab Occidente, exercitu collecto, eidem se obsidioni adiunxerunt, & inde se non discessuros, donec homicidas illos caperent & punirent, iureiurando confirmauerunt. Paucis itaque diebus exactis, & assultis aliquibus factis, die quodam murum ab Australi parte ascendentes, & sese intus audacter proiicientes, perfidos illos violenter aggressi sunt, & eos omnes intra Ecclesiam S. Donatiani, quam

fœda prius cæde contaminauerant, fugere compulerunt. Dignè sane pro meritis. Conueniebat namque in copotissimum loco, quem in contemptum Dei & Sanctorum eius non fuerant crudeliter infanare reueriti, diurnæ tædio obsidionis, vigiliarû & famis incommoditates & sitis, & assiduos imminentis timores mortis pœnaliter tolerare cogerentur inuiti.

CAP. XXXVII.

De effugio Præpositi, & latibulis ipsius.

VErum pridie quàm hoc cõtingeret, illis intrinsecus inclusis, & aliis forinsecus obsidentibus, incertum vtrum negligentia obsidentium vel industria (aiunt enim, quod & certius est, quosdam eorum corruptos fuisse pecunia) Præposito effugiendi permissa est copia. Nam de fa-

stigio muri ad terram fune demissus, & quorumdā auxilio ab obsidione latenter eductus, noctibus ambulando, & diebus delitescendo, ad domū Alardi V Varneftimensis, qui neptē illius Agantrudem, castri, quod dicitur S. Audomari quondam Castellanam, habebat vxorem, miser iam & miserandus confugit. Quo in loco cum per tres ferè septimanas iam delituisset, & præsentia eius rumusculis quibusdam dubiis, & incerta vulgi opinione diffamari cœpisset, iam eū vlteriùs inibi retinere non audentes, singulis noctibus eum per diuersa loca trans mittebant, vt vel sic fugam eius celarent, quam deprehendi multo perè metuebant. Diebus igitur Paschæ peractis, octaua videlicet Dominicæ Resurrectionis die, præfato domno Guillelmo Ypræ fortè tunc constituto, huius occultationis fama innotuit. Qui vt audiuit, protinus

exiliuit, equum ascendit, & eundem
Præpositum perquirere magno cum
strepitu & festinatione intendit. Do-
mum itaque Alardi, & omnia eius la-
tibula, necnon & domum filiæ eius,
in qua proxima nocte præterita miser
ille quicuisse asserebatur, scrutati, cū
quem quærebant non inuenissent,
vehementer sunt irati; & primum
quidem vtramque domum illam,
quasi pestiferi præsentia viri conta-
minatæ, & ob hoc igne purgandæ
fuissent, incendunt, & deinde filiam
eius præfatam in crastino, nisi Præ-
positus redderetur, membris debili-
tandam comprehendunt. Vnde &
idem dominus Guillelmus hominiū
Alardi guerpiuit, & eo diffiduciato;
totum feodum eius saisiuit, & de filiæ
eius dehonestatione, conditionem
quam suprà diximus, fide & sacramē-
to securitatem fecit, & sic indè re-
cessit.

CAP. XXXVIII.

De proditione eius & morte.

RE itaque in arto posita, quid facto opus esset Alardus & sui tractare cœperunt; & cū hinc filiæ suæ non parcendum, indè Præposito ipsius detrimento nihil sentirent salutis conferendum; tandem Præpositum decreuerunt reddere, vt sic salutem lucrarentur, vel filiæ suæ. Vt ergo quod ipse fecisse accusabatur, iustè perpeti cogeretur, de domo in qua cum retrulerant cuiusdam mulierculæ ministerio eū educi; & sic his, qui ad eum capiendū præparati fuerant, tradi fecerunt. Igitur ad castrum VVarnestimense eadem nocte perductus, & ibi vsque ad lucem seruatus est. Vbi & Presbyterum ad se vocari postulauit, & peccatorum suorum pœnitentiam agens, confessionem

Deo & illi in conspectu omnium fecit, & solo prostratus, & pectus pugnīs percutiens, indulgentiam sibi à Domino tribui supplex oravit. Die autem factō, cū iam Ypram equo pergere, ab his, qui cum cœperant, moneretur; equitare quidē omnino recusavit, sed nudis pedibus, cū tamen gelu esset, incēdere maluit. Et cū iter arripuisset, quendā de Clericis, cuius hæc ipsa relatione cognovimus, sibi acciuit, & hymnum Ambrosianum, *Te Deum laudamus*, cum ipso antiphonatim decantare cœpit. Quo dicto, horas beatæ Mariæ, eadē supplicationis deuotione cantando compleuit, & sic ad psalmodiam cōuersus, secum ipse cum silentio attentē psallere studuit. Yprensis igitur obuiis eum susipientibus, & Ypram ducētibus, passimque pugnīs, virgis, lapidibus, & marinorum piscium, qui illis in partibus grandes admodum

capiuntur, capitibus cædentibus, omnique genere contumeliarum afficiētibus, semper in patientia, ne dicam quod quidam, duritia & silentio perseverabat, & ferè vsq; ad ipsam mortem psalmos indefinēter ruminabat. In patibulo igitur collo & brachiis suspensus, & multa ferientium cædemactatus, tali ad vltimum exitu est exanimatus. De quo hîc silendum non censeo, quod quandiu in prosperitate fuit, huiusmodi contumelias & irrisiones plurimū abhorruit. Nam quibusdam ipsius familiaribus referentibus certò cognoui, quòd sæpè, cum de passione salutifera Domini nostri Iesu Christi communis sermo inter domesticos incidentes haberetur, & patientia eius ab aliis prædicaretur, dicere consuevit: Mirū cur Dominus talia pati voluerit. Certè si mihi huiusmodi garciones taliter insultarent, iniurias meas præfer-

tim si opus esset impigrè vindicarem,
& illudenti mihi saltem sputaculum
in faciem iactarem. Vide quòd quæ
intolerabilia maximè solebat iudica-
re, ea ipsa ad augmentum miseriæ suæ
coactus est tolerare.

CAP. XXXIX.

*De pugna Guidonis, & amborum
irrisione.*

E Adem autè hora dominus Guil-
lelmus Ypra egreditur, & ad
causam Guidonis de Stenfordo, qui
nuper eodè crimine, quod videlicet
in mortem Comitis consiliū & assen-
sum præbuiſſet, pulsatus fuerat, exa-
minandam proficiscitur. Qui videli-
cet Guido dum contra impetitorem
suum Hermannū cognomento Fer-
reum monomachiam hac pro causa
inisset, & primo quidem congressu,
& secundo superior in pugna fuisset,

& eundem Hermannum armorum nimio pondere onustum ipse æquè graui armatus lorica & galea, terræ prostratum, & proprii corporis, & tanti oneris ruina deprossisset, virtute confortatus, ac si nullum sentiret pondus Hermanus surrexit, & cum qui, vt dictum est, secundò superior fuerat, versa vice subiiciens ad confessionem patrati sceleris vrgere cœpit. Quid plura? Diuino tandem iudicio victus, & de crimine quo impetebatur conuictus, & sic demum supplicio mortis est addictus. Quod cum apud Riningas factum fuisset, continuo eum comprehenderunt, & Ypram pertrahentes iuxta miserabilem illum Præpositum in eodem patibulo ipsum quoque iam miserrimum, eodem die tertio Idus Aprilis suspenderunt. Vbi dum aliquandiu pependissent, & fetore sui aërem corrumpere incœpissent, Brugeses iterum consiliū inic-

runt, & eos extra villam eiiciendos, & ibi diligentius reponendos esse decernunt. Neque enim à tormentis vel mortuorum & irrisiōibus abstinere poterant, quorum perfidia tali patre & domino se orbatos esse plangebant. Itaque arborem excelsam crexerunt, & rota plaustrī desuper imposita coriis boum, quò diutius feruari possent, infutos super eam illos inuicem cōiunctos, & quasi mutuo complexu colligatos sedere fecerunt. Verum paucis diebus euolutis, cadauera eorum furtim inde sublata & tumulata sunt. O tremenda nimirū diuinæ distriktionis iudicia! Quis enim suspicaretur vnquā, vt de Guidone taceam, Brugensem Præpositū, huius quidem seculi filium splendidissimum, & omnibus istius mundi diuitiis affluentissimum, & post Comitem solum ferè totius terræ huius potentissimum, ad tantam vnquam

miseriam esse deuenturum, vt nec inhonestè viuere, nec honestè saltem ei liceret hanc vitam finire? Sed qui potentes deponit de sede, & altà à longè cognoscit, ac discretissimo æquitatis suæ iudicio secundum opera sua singulis retribuit, ipse eorum celsitudinem deicere, & potentiam ad nihilum redigere, quando & quomodo voluit singulariter potens fuit.

CAP. XL.

*De fuga Burchardi, & miraculo
in Naui.*

Porro Burchardus ille, quem primū Marchionis venerabilis Caroli caput percussisse commemorauimus, cum multas sustinuisset angustias obsessus, humano quidem ad modicum vsus auxilio fugit, sed diuino cœptis eius obuiante consilio

effugere minimè valuit. Nam sicut post ex eius claruit confessione, de turre illa egressus, primum quidem aliquandiu latuit, ac deinde nocturno tempore sociis quibusdam itineris, quos sibi fideles non dubitabat, secum assumptis fugam iniit, consultius arbitratus longinquas petere regiones, ut incognitus apud extraneos securius se occultaret, & egenam ac miseram vitam sic saltem protrahendo qualitercumque protelaret. Cum igitur ad aquam quandam, quam nauigio cum transire oportebat, deuenisset, nauiculam in ripa præparatam inuenit, & iam eam ascendit. Quam cum ut in ulteriorem dirigeret ripam, à terra repellere tentaret, illa occulto diuinæ virtutis pondere pressa immobilis stetit, & loco moueri non potuit. Quod ut sensit, totis cœpit viribus uti, & ut eam à ripa seduceret, quanto potuit conamine niri. Cum

que diu luctatus nihil prorsus profecisset, socios aduocat, & ad auxilium sibi ferendum inuitat. Quibus statim cum admiratione accurrentibus, & ad illam vnam modicam nauiculam promouendam, omnes quas habebant vires impendentibus, illa nihilominus velut murus immobilis perseuerat, quippe quam vis diuina omnino immobilem faciebat. O detestandam Burchardi dementiam! Burchardus sceleris sui immanitatem parui pendit & negligit, quam lignum insensibile execratur & refugit. Nauicula modica robustorum validis impulsibus virorum resistit, quæ vnius manu pueri facile moueri & circumduci consuevit. Verum hæc tua, Christe, sunt opera, qui errantes ad viam veritatis conuertis, & superbientes ad gratiam humilitatis inflectis; qui ne in æternum damnes, plerumque temporaliter punis. Tu enim nunc

per nauiculæ immobilitatem hunc virum iniquum, vt suam nequitiam recognosceret, & tuam iustitiam expauesceret, monuisti; qui olim per asinæ loquelam Prophetæ Baalam insipientiam corripuisti. Miser itaque ille hoc tandem miraculo compunctus, & ad cor quandóque reuersus, nauigium deseruit, & in terram se prosternens, & reum pectus pugno percutiens, ac vbertim lacrymas fundens, reatus sui pœnitudinem multo cum gemitu gerere cœpit. Prius namque cum huius peccati nunquam pœnituerat. Cumque post lamentum nauiculam iterum mouere tentasset, & eam vt prius immobilem vidisset, voluntate Dei certius iam comperta, cœpit desperare de temporali salute sua, & confestim tristis & mœrens consueta repetiuit latibula.

CAPVT XLI.

De proditione ipsius.

CVM autem diuersis in locis diebus non paucis iam latuisset, & iuxta Insulam in quoddam tuguriū ductu cuiusdam serui sui casu diuertisset, seruum eundem itineris sui ducem ad domum Bernardi auunculi sui, vt panem sibi quo famelicam animam refocillaret, peteret (esuriebat enim) transmisit. Et ille quidem quod iubebat exequi cupiens, mandato eius libenter obediuit, & ad eādem perueniens domum ad opus Domini sui, vt puta hominis deliciis assueti, delicatum panem petiuit. Sed miro omnipotentis iudicio, qui domini sui quærebat salutem, inuenit mortem, & esurienti conferre cupiēs quibus egebat alimenta, reo præparauit quæ meruerat tormenta. Hac
etenim

etenim occasione præfato Bernardo dominum suum, simpliciter tamen, quamuis per alias personas prodidit: cui, ut puta auunculo, nepotem suum nequaquam occultandum credidit. Iusto autem Dei agebatur examine, ut qui dominum suum occidere non fuerat veritus, ipsum quoque occidendum suus proderet Dominum servus. Bernardus verò Hugoni fratri suo hoc idem protinus nunciauit. Hugo ergo communicato cum fratribus suis consilio, licet nepotem suum servare magis, si tamen auderet, quam prodere maluisset, Insulano tamen Castellano & Brugenſibus Burchardum se nunciauit inuenisse, & citò venirent, ac tanti criminis reum ultione, quam dignam arbitrarentur, punirent, mandavit. Cui profecto si parcere voluisset, haud dubium quin & ipse magnum salutis suæ periculum incurrisset.

*De comprehensione eius, & patibulo,
& morte.*

INsulani verò mandato Hugonis
audito, cum magno protinus tu-
multu perrexerunt, & Burchardum
comprehensum Insulam duxerunt,
& in foro ei patibulum parauerunt.
Verùm ille æternæ formidine dam-
nationis, vt timeret excitatus, & su-
pernæ intuitu miserationis vt spera-
ret animatus, seipsum, districtè ad-
modum accusare, & cunctis dignum
suppliciis cœpit publicè inclamare.
Denique manum suam dexteram,
quæ in effusione sanguinis iusti cruē-
tum exhibuerat ministerium, ob pœ-
nam tanti criminis abluendam, & in-
dulgentiam promerendam abscidi
flagitauit. Cùm autem nemo esset
qui hoc faceret; ipse sibi saltem eam
amputandi facultatem postulauit cō-

cedi. Verùm vtrumque sibi denegari consentiens, iterum ad sui accusationem, & supernæ miserationis inuocationem còuersus est. Reatum ergo suum manifestè confitendo & plangendo, & diuinæ respectum misericordiæ implorando, ac ad hoc ipsum fiducialius sperandum misericordias antiquis peccatoribus exhibitas còmemorando, omniũ viscera assistentium ad pietatem & miserationem commouit, & ad lacrymarum effusionem vniuersos penè lugubri sua lamentatione coëgit, & vt per temporales carnis molestias æternas euaderet pœnas, modis quibus potuit fategit. Itaque membra sua ipse tormentis sponte aptauit, & rotæ radiis intricatus, & in excelsò stipite exaltatus, in eadē deuotione, confessione, & supplicatione ab hora diei nona, vsque ad crepusculum diei sequentis perseuerans expirauit.

CAPVT XLIII.

*De perturbatione post mortem Comitum,
& pace.*

SED iam dignum est vt articulum
ad superiora tempora conuertamus, & ea quæ prius quidem gesta, sed à nobis hæctenus sunt prætermiffa, referamus. Neque enim quæcumque eodem tempore contigerunt, eodem etiam tempore dici potuerunt. Interfecto igitur Brugis, vt dictum est, Marchione, fama mali tanti confestim circumquaque diffunditur, & ipsa eadem die vsque ad triginta ferè leugas extenditur. Vbique ergo luctus, vbique gemitus & dolor ingens clericorum, monachorum, rusticorum, pauperum, postremo omnium in pace & tranquillitate degere, & æquitatem feruare & feruari cupientium. Raptores autem quilibet & iniqui,

utpote vinculis quibus tenebantur
diruptis soluti, (magis enim, sicut
etiam tunc euidenter patuit, Caroli
refrænati fuerant timore quàm Dei,)
vniuersa turbare, mercatores quosq;
& viatores rebus suis exspoliare, &
ipso plerumque ligare & incarcerare
cœperunt. Tanta namque fuit per-
uersorum hominum rabies & nequi-
tia, ut nec sancti temporis (nā Qua-
dragesima erat) eos cohibere valeret
reuerentia. Verum omnipotētis Dei
subueniente clementia, in breui re-
pressa est eorum dementia. Præfatus
enim Guillelmus domni Caroli con-
sobrinus, mox ut mortem Comitis
nuncio deferente cognouit, eadem
die sibi Comitatum, frustra tamen,
vendicauit, & Arigam oppidum mu-
nitissimum occupauit, & oppidanos
omnes sibi fidelitatem iurare fecit.
Cumque & S. Venantium, Casletū,
Bellulam, Yprā, Bergensem quoque

& Furnensem terram pari modo sibi subegisset, motus raptorū in finibus illis citò repressit, & pacem seruari mandauit. Cæteri quoque Barones terræ inuicem collocuti, Deo inspirante, paci consenserunt, & singuli partes suas defensare studuerunt.

CAP. XLIV.

*De aduentu Regis, & ordinatione
Comitatus.*

PORRO magnificus Rex Francorum LVDOVICVS, audito quòd consobrinus suus Carolus interiisset, & Guillelmus honorem sibi indebitum, præsertim ipso non assentiente inuasisset, & grauiter tulit, & tam illū ea, quam vsurpauerat, dignitate priuare, quàm amici mortem desiderās vindicare, ad urbem Attrebatū circa mediam Quadragesimā venit. Quo etiam Guillelmum iuuenem dictum

Normanniæ Comitem, à patruo suo Henrico Anglorú Rege, sicut initio huius Opusculi commemorauimus, impiè exheredatum, qui Reginae sororem nuper duxerat vxorem, venire mandauit. In qua vrbe cùm diebus ferme quindecim commorati fuissent, & plures, qui sibi Comitatum terræ nostræ competere assererent, Arnulfus scilicet nepos domni Caroli, Balduinus Montensis; & præfati Guillelmi, qui iam partem terræ nostræ prælibatam violenter tenebat, nuncij frequentes hoc ipsum expectantes ad Regem venissent; tandem Regina Dei, vt arbitror, occulta, sed tamen iusta dispositione præualuit, & animis procerum quorundá multo ingenio ad sibi consentiendum inclinatis, sororio suo Normanno Comiti decimo Kalendas Aprilis Comitatus dominium obtinuit.

CAP. XLV.

*De impedimentis Regiæ dispositioni ob-
uiantibus, & Comitis processibus.*

CVIVS potentiam patruus eius
ad sui detrimentū veritus cres-
cere, eam totis visceribus & artibus
quibus poterat contendit imminue-
re. Nepotem ergo suum Stephanum
Blesensē, Bononiæ & Moritonij Co-
mitem transmittens, & per ipsum &
alios partis suæ legatos multa tribuēs,
& plura promittens, multorū animos
potentium sollicitat, Flandriam suā
hereditatem esse, & ex parte Roberti
Casletensis auunculi sui sibi iure cō-
petere affirmat, & his modis in suum
eos fauorem conciliat, ac Ducē Lo-
uaniæ socerum suum, & Montensem
Comitem, & Thomam Codiciacen-
sem, necnon & sæpeditum Guillel-
mum sibi confœderat. Hos omnes,

Comitis Flandriæ, Martyris. 105
& eorum auxilios regis voluntati
& ordinationi contraire, & profectus
noui Comitis modis omnibus impe-
dire hortatur & instigat; non tam ut
ipse Flandriam, quod forsitan fieri
posse iam desperabat, obtineat; quàm
ut vires Comitis, quas sibi periculo-
sas suspicabatur, eneruet & destruat.
Rex autem cum Comite Atrebatum
ciuitate post aliquantum tempus e-
gressus, primò Insulam, deinde Gan-
dauum & Brugas ægrè tum (nam v-
bique ferè Anglici fautores plurimū
impediebant) recepit, & obsidionem
sua præsentia roborauit. Vnde Co-
mes post Pascha reuersus per Insulā
& Betuniam, vsque ad urbem nostrā
Taruenam peruenit, & ibi cum ma-
gno Cleri & populi gaudio susceptus
biduo mansit. Postea cum castrum,
quod dicitur sancti Audomari, Ca-
stellano & burgensibus cum gratan-
ter, conditionibus tamen quibusdā

promissis, suscipientibus obtinuisset,
& ibi paucis diebus murum fecisset,
iterum Taruennam transiens Insulã
reuertitur.

CAP. XLVI.

*Brugensium deditio, & miraculum in
alimentis, & Ecclesiæ purgatio.*

INterea Rex Robertum reliquosq;
illos homicidas Brugenses, de tur-
ri, in quam confugerant, egredi, &
sefe dedere coëgerat; & in carcerem
& vincula vniuersos retruserat. Quo-
rum narratione innotuit miraculum
quod narro. Ex quo enim in eadem
Ecclesiæ turri obsessi morati sunt,
nullo alimentorum, quorum non
modicam illuc copiam contulerant,
sicut nec si terram gustarent, sapore
delectati sunt: sed postquam sese de-
dentes exierunt, continuò quem
tanto tempore perdiderant gustum
receperunt. Cum enim Roberto si-

rienti de eodem quo ibi inclusus bibere consueverat vino propinassent, optimum eius saporē laudavit, seque ab ipsius initio obsidionis de bono vino non bibisse iuravit. Nesciebat quippe quod de hoc ipso quo solebat bibisset. Quod cū ei indicatum fuisset, opus Dei in suorum castigatione peccatorum recognovit, & diuinam cum cæteris bonitatem collaudavit. Rex verò Ecclesiam S. Donatiani non solum sanguinis effusione, verumetiam eorum execrabili & immunda habitatione multipliciter pollutam, cunctis inde spurcitiis eliminatis purgari; corpúsque venerabile, quod ibi negligentius quàm decebat, tumulatum fuerat, in aliam Ecclesiam præcepit deportari, quatinus funus eius ibi diligentius curaretur, & deinde congruo sibi honore in Ecclesia rursus humaretur. Quod & factum est.

CAP. XLVII.

*De miraculo in corpore Comitissæ ostenso,
& eo tumultato.*

VErùm quid ibi miraculi diuina ostenderit dignatio, non videtur prætereundum silentio. Testati sunt enim mihi sciscitanti plerique qui affuerunt, viri veraces & religiosi. Quorum vnum, domnum scilicet Absalonem S. Amandi Abbatem pro suæ sanctitatis merito dignum est hîc nominari; quòd cû venerabile illud corpus, eo, in quo illud ante quinquaginta tres dies repositum fuerat, monumento dirupto detexissent, ad gloriam Dei & Martyris sancti ostendendam, in tantû à corruptione alienum inuentum est, vt nec tenuissima quidê modici fœtoris nebula exinde ascenderet, quæ nares circumstantiû, siue idem funus contrectantium &

curantiū vel in minimo aliquatenus offenderet. Verumtamen cū quantum diximus iam tempus in monumento haberet, sic erat vulneribus crudis & omnino recentibus tractabile, ac si eodem die interfectus fuisset. Tanta quoque suauissimi odoris fragrantia totum illum locum diuinitus infudit & impleuit, vt nulli fore dubium videretur, quòd Deus fidelem suum glorificare voluerit. A Domino factum est istud, & est mirabile in oculis nostris. Quod nimirum eo amplius mirabile iudicatur, quòd humanorum cadaueribus corporum vix aliquid aliud foetidius aestimamus. Ecclesia igitur Domini Simonis Tornacensis Episcopi ministerio, qui in hoc ipsum à Rege de Francia fuerat accersitus, more Ecclesiastico reconciliata. Sed & memoratum corpus summa reportatur Cleri & populi deuotione & reuerentia, &

septimo Kalendas Maij in Ecclesia media tumulatur, in extremo examine resurrecturus in gloria.

CAP. XLVIII.

De expeditione regali, & traditione Yprensi.

QUibus omnibus solemniter, & eo quo dignum erat, honore adimpleris, Rex cum exercitu quem congregare poterat Ypram contendit, & sequenti die, sexto videlicet Kalendas Maij, Comite sibi ex condicto cum exercitu ex parte alia impigrè occurrente, circa horam diei sextam illuc vsque peruenit. Porro sæpè memoratus Guillelmus Philippi filius, regiæ maiestatis celsitudinè minus quàm oporteret reueritus, extra oppidum ei multorum & fortiù, quos sibi confœderauerat, virorum & armis fretus & animis audacter

occurrit; & contra vniuersum illum exercitum acerrimè dimicare cœpit. Sed ille fortiter se agere arbitratus, dum hostibus obstinatissimè repugnat, dum in aduersos aciem dirigit & instaurat, quæ sibi infelicitatis temporalis & aduersitatis fouea præparata sit miser ignorat. Etenim iam pridem aliqui burgenfes, qui sacramentis ei non semel tantum, sed frequenter fidelitatem fecerant, cum quibusdam aliis hominibus ipsius de proditione eius conspirauerant, legatos inde ad Regem direxerant, seque ei portas aperturos, & Guillelmum tradituros iurauerant. Væ mundo abscandalis! imò, væ Flandriæ à proditionibus! Mirandum, nec minus miserandum, quòd terra infelix, cui Domino suo per proditionem orbari contigerat, non aliter quàm per proditionem alium acquirere valebat. Et hanc quidem pauci Yprensium

disposuerant faciendam. Iudicauerant namque commodius regiæ voluntati parere, quàm Imperiis Guillelmi, & sibi suspectæ potestati subiacere. Neque ideò, vt ferunt, quòd ipsius personam in aliquo culparent: sed quorundam affinium eius dominium intemperantius futurum formidarent.

CAPVT XLIX.

*Guillelmus capitur, Ypra incenditur,
Flandria subigitur.*

ITaque cùm ab hora diei sexta vsque ad nonam vtrimque diuersis concursibus ab Aquilonali parte & Orientali pugnatum fuisset, vexillo, quod in signum futuræ proditiōnis super summum Ecclesiæ S. Petri fastigium ex proposito constituerāt, aduersæ partis cuneos accersierunt, & porta meridiana aperta cos in oppidum

dum susceperunt. Quibus protinus totam villam percurfantibus, & rapinis ac incendiis vniuersa vastantibus, Guillelmus destitutum se tum demum præsentiens, quod solum superesse videbat, fugam arripuit: sed fuga fera fuit. Fugientem enim cum Daniel Tenremundensis, consecutus comprehendit, & armis exutum Comiti Guillelmo captiuum reddidit. Ypra igitur eodem die à porta Septentrionali vsque ad portam australem spoliata & incensa, ac multitudine militum innumerabili comprehesa, Rex & Comes Mescinas Monasterium adeunt, Guillelmum captum secum adducunt. Quem cum postera die Castellano Insulæ custodiendum commendassent, Ariam perrexerunt, & ea in deditione recepta, Casletum, & reliquam illam interiorem Flandriam facillimè subegerunt; & sic tandem ad vlciscendam

honorandi Caroli mortem Brugas
iterum redierunt.

CAP. L.

De supplicio dedititiorum Brugenſium.

FRatrem quoq; Præpoſiti Gucl-
ricum, quem in mortem eius
coniuraſſe ſuprà memorauimus, cum
aliis ferè viginti octo dedititiis è car-
cere productis, de excelsa turri præci-
pitare fecerunt: ſicque homicidæ illi
condignis tantæ iniquitati cruciati-
bus interierunt. Qui quamuis non
omnes conſilio vel factò peccau-
erant æqualiter: iniquitati tamen con-
ſentiendo, & iniquis auxilium feren-
do paribus quodammodo iniquita-
tis nexibus ſe omnes obligauerant.
Et ideò quorum non abhorruerant
iungi conſortio, eorundem non im-
meritò ſunt puniti ſupplicio. Rober-
tum autem, quem & ipſum ex con-

iuratis fuisse suprà ostendimus, quique
itidem eo quòd à populo vehemen-
ter diligeretur, & modis quibusdam
excusabilior cæteris videretur, tutè
satis puniri posse non æstimabatur,
secum abducere decreuerunt. Quem
cùm Castrum vsque perduxissent,
& ille reatus sui multam pœnitudinẽ
gereret, extra oppidum eum capitis
abscissione animaduerti fecerunt.

CAPVT LI.

De improbitate Ingrasni, & fuga.

DVM ea geruntur Ingrasnus
Esnensis vnus ex prænominatis
cõiuratoribus qui patrui sui Theo-
derici Discamudensis præsidio fre-
tus vsque in id temporis excusatio-
nes in peccatis excusauerat, & perfid-
iæ suæ tenebris obcæcatus ipsius
Regis aspectibus & Comitis impu-
denter se ingerere non erubuerat, &

si quis eum super hoc crimine impetere auderet, viriliter sese defensurū iactauerat, diffidere cœpit: & primū quidem apud suos aliquandiu se latendo continuit: ac deinde opportunitatem temporis nactus, omnibus postpositis suæ salutis consulere, gestiens è patria profugit, & in terra nostra vsque in hæc tempora, me scilicet hæc scribente, nusquam vltra comparuit.

C A P. LII.

De Guillelmo Vironiacensi, & fuga eius.

AT Guillelmus Vironiacensis, & ipse, sicut aliorum claruit confessione, coniuratorum vnus, quē nimirum aliis attentus, & finis ipsius expectatione suspensus, intactum ferè reliqueram, iniquitatem suam nequaquā tamdiu occultare valuit.

Sed quod in occulto perpetraverat, indiciiis continuò manifestis apparuit. Statim enim post Comitris occisionem, & thesauri eius direptione, Vironiacum regressus, non minimam inde secum attulit partem. Verum hoc suæ nequitiae fructu in longum lætari permissus non est. Cùm enim de aduersario deiecto tripudicaret, & de damnis alienis insolenter exultaret, repentinus eum pa-uor inuasit, & territum de Flandriae finibus exturbauit. Audito namque quod frater suus Lambertus, qui tantum, vt ex fine monomachiae, quam iade in Curia sæpè fati Guillelmi inierat, claruit, innocens erat, super morte Comitris impeteretur, & quod ipse ab eodem Guillelmo, qui iam per surreptionem hominum fecerat, diffiduciaretur, timere cœpit. Et primum quidem ad defensionem se parauit, sed in crastino reæ tantum

stimulis conscientiae cum exagitantibus, cum nemo cum adhuc persequeretur, vxore & paucis suorum, rebúsque, quas euehere poterat, secum assumptis, sexto post mortem Comitis die fugæ se credidit. *Fugit* nempe, vt Scriptura dicit, *impius nemine persequente*. Castellanus autem Curfiacensis, qui antea ei extiterat inimicus, statim vt fugam eius audiuit, armata multorum militum manu munitus Vironiacum contendit, & omnibus quæ ipsius fuerant mobilibus direptis, munitionem totam euertit, & nemine resistente, intantū vt nec stipes in loco remaneret, incendit. Ipse vero cum iuxta Tornacū ad villam quandam deuenisset, Tornacensibus cum insectantibus, & comprehendere ac punire tentantibus, vxore, & maiore suorum parte, rebúsque fere omnibus amissis vix equū nactus euasit, & in partes Ner-

uorum, duobus tantum sociis contentus secessit. Vbi monasteriū quoddam Monachorum adiit: & timore magis, vt postea patuit, humano quā diuino compunctus, Monachus tonsuram habitūque præsumpsit. Postea vero occasione vxoris, sine consensu cuius hoc fecisse asserebatur, paucis euolutis diebus Monachatum deseruit, & ad seculum, & ad arma derelicta sine retractatione mox rediit. In quo quidē factō satis euidenter declarauit, illud Religionis propositū quā fīctus arripuerit. Si enim vinculū vxoris vinculum cōpellebat solui Religionis, eis quibus tanto abusus fuerat tempore cur nō abstinuit armis? Nunquid & hoc lex coniugij cogebat? Nequaquam. Nā si verē cum suorum reatum pœniteret armis relictis, vxori, cū tantū illa maritale debitum exigeret, adhærere, & in sudore sui vultus pane

suo vesci districto fatigatus ieiunio debuisse. Nunc autem, ut multorum relatione comperimus, iram Dei non solum pœnitendo non curat placare, sed corde obstinato excusationes in peccatis excusare, & Deum magis irritans quàm placās, peccatis peccata non veretur augmentare. Timendū est igitur ei, & pro eo etiam nobis, ne quia tardat conuerti ad Dominum, subito veniat ira Dei, & in tempore vindictæ disperdat eum. Forsitan & ideò ibi tandiu aliis inuitis seruatur, ut si tempore sibi indulto non pœniterit, & dono misericordiæ Dei superbè abusus fuerit, iusto Dei iudicio grauius in fine feriat. Quod etiam de præfato Ingrassio non absurdè sentiri potest. Et hæc quidem omnia infra duos ferè post mortem Comitum menses consummata sunt.

CAP. LIII.

Conclusio Libelli.

ECCE voluntati vestræ ; reuerende Pater , imò iussioni , ac fratrum meorum piæ petitioni , prout valui parui : & materiam mei modum ingenij pariter & eloquij , vt in ipso apparet effectu , tantopere transcendentem vel contingere præsumens , multorum me reprehensioni simul & irrisioni exposui. Etenim stultus dum non loquitur , plerumque sapiens esse creditur. Silentium nempe eius non tam putatur sensus inopia , quàm humilitatis custodia. Vnde & ego si omnino siluissem , sapiens quidem putari potuissem : sed non eo ampliùs sapiens fuisset. Nunc autem quia imperitiam meam scribendo prodidi , sapientes , in quorum manus hæc fortè peruenerint,

indignabuntur mihi : & alij quidem calumniabuntur insipientem, alij subfannabunt præsumptorem, alij idiotam iudicabunt , nonnulli quoque stultum meritò inclamabunt. Quid ergo erit, Pater sancte, quod me tanta rerum euidencia convictum poterit excusare? Possum equidem obedientiæ vestra mihi auctoritate impositæ non incongruam causam obtendere : sed commodius arbitror calumnias huiusmodi etiam si quomodo possem euadere, quàm insipientiam meam pertinaciter excusando , tanto meorum cumulo peccatorum etiam fallaciam addere, fructumque mihi humilitatis adimere, & in fastum me vanitatis inaniter extollere. Vtilius enim est mihi , vt sciar insipiens , quod sum ; quàm vt æstimer sapiens, quod non sum. Illud namque non infructuosum humili timorem, istud verò

ruinosum superbo parere poterit,
quod absit, tumorem. Quem cum
omnibus aliis vitiorum sordibus pro-
pitius à me dignetur auertere, qui
omnem omnino superbiam sua dā-
navit humilitate, Amen.

FINIS.



